

## **ASO LULU, 19 IUNI 2019**

*Na nofoia e le Fofoga Fetalai le Nofoa i le itula e 9:15 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga ma Galuega a le Fono Aoa Fautulafono.

Ia, malo faafetai le lagimama ma le soifua manuia ua mafai ona tatou feiloai i pue o manu ae le o pue o mala i lenei taeao fou e faaauau le tatou galuega. E faatalofa atu foi i lau Afioga i le Palemia faapea le Kapeneta ma sui usufono mamalu uma o le Palemene, ae a le tapuaiga a Ofisa Sili o Pulega o Matagaluega ma Faalapotopotoga a le Malo. Malo le soifua manuia i lenei taeao.

### **TUUNA ATU O LIPOTI A KOMITI FAA-PALEMENE**

*Na tolaulauina e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma T.T.52(5).*

1. P.P.2019/2020 Nu.77, Lipoti a le Komiti o Tupe Maua ma Tupe Totogi i le P.P.2018/2019 Nu.151, Lipoti Faaletausaga a le Pulega o Faailoga ma Tusi Pasi Taualoa mo le Tausaga Faaletupe 2017/2018.
2. P.P.2019/2020 Nu.78, Lipoti a le Komiti o Tupe Maua ma Tupe Totogi i le P.P.2018/2019 Nu.163, Lipoti Faaletausaga a le Iuni Lakapi a Samoa mo le Tausaga Faaletupe 2017.
3. P.P.2019/2020 Nu.80, Lipoti a le Komiti o le Vaega tau le Tamaoaiga i le P.P.2018/2019 Nu.135, Lipoti Faaletausaga a le Faalapotopotoga o Eleele a Samoa mo le Tausaga Faaletupe 2017/2018.
4. P.P.2019/2020 Nu.81, Lipoti a le Komiti o le Vaega o Atinae Eseese i le P.P.2018/2019 Nu.58, Lipoti Faaletausaga a le Matagaluega o Fesootaiga ma Faamatalaga Tekonolosi mo le Tausaga Faaletupe 2016/2017.
5. P.P.2019/2020 Nu.82, Lipoti a le Komiti o le Vaega o Atinae Eseese i le P.P.2018/2019 Nu.117, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe 2017/2018.

**TULAFONO TAU FAAOFI O LE FAATATAUINA O TUPE FAAOPOPOO  
(NU.2) 2018/2019 & TULAFONO TAU FAAOFI O LE FAATATAUINA O  
TUPE 2019/2020**

**– felafolafoaiga i luga o le faitauga faalua – Aso 2**

**FOFOGA FETALAI:** E tolopo le Galuega a le Fono Aoao i le aso ananafi ua maea ona saunoa le sui usufono mo Gagaifomauga Nu.3. Ia, o le avanoa foi lenei mo se isi sui usufono e tulai mai e saunoa e tusa ai o le tatou galuega.

Tulai mai le sui usufono mo Vaimauga Sasae, tulai mai lau Afioga i le sui usufono mamalu.

**Afioga SULAMANAIA FETAIAI TAUILILI TUIVASA (Vaimauga Sasae):** Ou te masalo o se agaga faagaeetia ia te au le tofiaina o au ou te vaisoaina le gasu o le taeao mai lava le Siufanua i Saua ina ua tatou fesiafai i le taeao lenei, i le agalelei ma le agaalofo o le Atua po ua tatou fesilafai foi i magafetausoifua.

Ae o lou tulai i lenei taeao ou te tulai ma lou agaga faaaloalo ou te tautala foi ma le fefe ma le gatete, e pei o le upu i le to sua ma le to le sua i laufanua o Fiamē ma Salevalasi. E mafua i se a ona ou fefe ma ou gatete? Leaga o lea ua paia ma ua mamalu le Maota nei, o le maota i Tiafau nei o le malae ole faautugatagi a Samoa. Fai mai o Lalotea o le malae e faaututagi ai Tumua, a o le malae lenei o Tiafau e faaututagi ai Samoa. O le ala lea o lou fefe ma lou gatete. E mafua i se a? O le tofa lea e i totonu o le Maota lenei, o le faautautaga i tupu ma tamalii o le atunuu na tofofi mai, e omai e tautua le atunuu lenei. O le ala lena ua ou fiafia ai i lenei taeao, ua ou lauga mua ai i lenei aso, leaga o eleele tau Tuisamau lenei, o ou eleelesa nei, sa ou le lauga ananafi ona ou te faaaloalo i le sui usufono fou lea, a o eleele nei o ou eleele ou te tapule ai, o lea foi ua ou mitamita i lenei taeao ina ua mamalu le taeao lenei leaga o lea ua tatou aiga fesilafai ma ua tatou faletalatala e ala i le tou afifio mai ma talaaa mai. O le mea lea sa fai i gauta i le malae taalo lea, e leai, o le tatou Fono lena sa fai i le eleele o Faleata, o le malae sao lenei o le malae o le faautugatagi a Samoa.

Ona i ai lea o le manatu, a o le i oo se matou faamatlaaga i le Tulafono Tau Faaofi po o le faasoasoina po o le lufilufiina o le tamaoaiga o le atunuu, e muamua ona matou ofo alofa atu lenei itumalo i le afio o lau Afioga i le Palemia. Se a lafalafa a Tuna o oe o le Malietoa, o oe o le Tuiatua, o oe o le Tuiiaana. E ui a ina le afio mai le Afioga i le Sui Palemia, leaga o le itumalo lenei e ava tele i le itupa lea o tina, o le ala foi lena e mitamita ai lenei itumalo ma lagolago pea le Afioga i le Sui Palemia, po o le Afioga i le Sao Faapito po o le Afioga foi i le Sao Papa, le Sao Falenaoti, leaga o lea e tuualalo i lau Afiogai le Palemia. O le ala lea o lo o see ai pea le sa o Samoa. Ona e a? O lo o i ai se tina o lo o faatinoa le agaga o le tina o Maria, e faufautua i lana tama. E le o oe la o Iesu, a o lea e faufautua ia Maria le itupa o tina, lea e manaia ai le sa o Samoa.

E faatalofa foi i a outou Afioga i Minisita aemaise foi o le afifio o Minisita Lagolago. Liliu mai foi i lenei talaga atoa, faatalofa atu lenei itumalo i paia i tupu ma tamalii o tupu ma tamalii o alii ma faipule o le Palemene o Ssamoa, ae silisili

ona faatalofa atu i lau Afioga i le Fofoga Fetalai aemaise le Sui Fofoga Fetalai. Ona o le a? o lea lava e faatino le tautua. A tatou vaai i si o tatou atunuu i le 57 o tausaga lea o lo o i ai i le taimi lenei, o lea lava e talavou le atunuu. Ae a mea ua tutupu, le tamaoiga ma mea ua tutupu i lenei vaitau? Leai ua matua ona o le a? O le faatautaiga o le tatou atunuu. O le upu a le atunuu e le mafai e mea nei o tufanua, se i tulou, ona tautua. Na o ai? Na o tupu lava. O outou o tupu, o outou o tamalii. O le ala lena e tuufesili ai tagata, o le a le mea e ala ai ona o e faaututagi i le malae i Tiafau ae a isi malae? Ona o le tofa lea, o le faautaga lea, o matai Samoa e omai e soalaupule, o i e ola ai le pagota. O ai lava e aumai, a malele loa le Maota lenei, ua uma mea uma, o le faasinomaga lea o le atunuu.

Ona matou faapea lea, e le tuua foi le tapuaiga a Lana Afioga Mamalu O Le Ao o le Malo o Samoa, lau Afioga Tuimalealiiifano faapea foi lana Masiofo le teine tau Vaimauga le Afioga ia Maposua, e faapea foi le tapuaiga a le Sui o le Fono a Sui Tofia ma lana Masiofo, faapea foi le Afioga i le Faamasino faaolioli aemaise le paia i alii ma tamaitai faamasino o lo o tua i ai le atunuu, o lo o ave i ai le faatuatuga i le fai mea tonu ma le fai mea sili. Faamalo i lea foi ituvai o lo tatou atunuu.

E le mafai foi ona faagaloina le lauga a lenei itumalo le tapuaiga mamalu a alii ma e o lo o auuuna i le Atua i le afaigaluega paia a le Atua i so o se fatafaitaulaga, ma e o lo o ofoina le latou soifua e tulivae, anapopogi ma tatalo aua se manuia o Samoa ma ona tagata. Malo tatalo, malo foi le tapuaia o faiva o le atunuu.

Ae le mafai lava ona faagaloina le tapuaiga mamalu a si ou itumalo Vaimauga Ssasae po o le paia foi aua Aiga e lua ma le nofo a tula mai lava i Fusi ma Fanuatanu, o Lalotea, Niniva ma Punialavaa, aemaise o Fatutolo ma Pilioua o lea e manuia le tou sui usufono ona o a outou tatalo ma la outou tapuaiga.

Ia tapuai maia se i fai se sao aua le lufilufiina o le tamaoiga o le atunuu ua opea nei i le Maota.

E muamua ona ou faafetai i lau Afioga i le Minisita o Tupe aemaise foi lau Matagaluega, i le Ofisa Sili ma le Pulega. E le faigofie lenei mea o le tapenaina o le Tala o le Tupe ona e a? E alu le taimi, alu masina, e le mafai foi ona outou momoe ma tofafa i le tau matimatiina ma le aamiina foi o Matagaluega a le Malo e o atu e fai i ai ni fesili aua le tamaoiga o le atunuu.

I le matau a lenei sui usufono mo Vaimauga Sasae ina ua tulai mai lenei Faigamalo, sa ou vaai lava i le faasoia a le Minisita ma le Matagaluega, ua mafai ona, se i tulou lava le upu, sesele a tatou tupe alu, ona o le a? Ona o le alofa i le atunuu. O lea la sa sau pei sa tatou tigaina i le Nofoaiga muamua, sau le lona lua, sau lea ua i ai nei tatou i lenei taeao, e ui lava o lea e fesilisili le sui usufono o le Vaimauga po o fea e aumai ai le mea e faaatoa ai le mea lea e ova ai le tupe alu i lo tupe mama, ae ou te talitonu lava lou sui usufono, o le atunuu lenei a uma ona faatino se fuafuaga ona tuu lea i luma o le fatafaitaulaga, ona tuu lea i luma o le Atua na te faasoia mai mea i lea taimi i lea taimi e ala i le faasoia limalelei o le tatou atunuu. Faamalo i lau Afioga i le Minisita.

Na pau lava si vaega e avatu ai nai tuualalo a lenei itumalo i le Tala Faatatau Faaopopo 2018/2019 ma le Tala Autu o le Tupe ua i ai nei, ia o nai tuualalo lava i lau Afioga i le Minisita ma le Matagaluega, vaai foi i nisi o vaega o lea e le i pasia le tatou tupe a o lea ua vaai ua i ai tulaga e faamatuu atu ai le auunaga i

lalo o le Matagaluega o Leoleo. O lea foi e le i aumaia le tulaga aloaia i le pasiaina o lea foi fuafuaga o le a toe faamatuu atu le pasiaina o a tatou taavaleafi i lalo o le Matagaluega o Leoleo, ia sa faapena se fesili a lenei itumalo, sa faapea lava au ma lenei itumalo na o le tuuina atu o vaega foi na e i luga o le aualatele e vaaia le traffic i Malu o le Malo, a o lea ua toe avatu ai ma le pasiaina o tatou taavale. O le lagona lena. O lou popolega, pei o lea o le a tatou vaai i le tulaga lea, ae se i tatou vaai i le seleni foi lea e maua mai i le LTA, pei o lea o le a toe sau i lalo o le Matagaluega o Leoleo, a o le Matagaluega lenei o Felauaiga, o lo o tele le faatuatuga o le atunuú

**FOFOGA FETALAI:** Malie le sui usufono ua tulai mai le faauilavea a le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia):** Lau Afioga i le Fofoga Fetalai, e taua lava le vaega lea ua oo i ai le saunoaga a le sui usufono, faamalo foi ua ia lagaina le mataupu lenei, ona o Tulafono lava ia tau fuafuaina o tupe a le Malo, o fea lava le Matagaluega e saili tupe ma maua ai tupe, e tasi lava le auala e faaii i ai, e ave uma lava i o i le Matagaluega o Tupe. E i ai foi vaegatupe o lea e tusia i lalo o tupe maua i lau foi Matagaluega i le vaega lea o passport, visa, aemaise foi tatou tupe ia e auala mai i le tatou Va i Fafu, i le tulaga foi lea o le faaaoga o le tatou domain name. O fea lava le Matagaluega e sau ai tupe ia, e tasi lava le mea e alu i ai, e alu lava i o i le Matagaluega o Tupe, ona vaevae mai ai lea, o le tupe alu i i, tupe alu i i, o le tupe alu i i. O le mafuaaga, o lea tatou te o i mea malamalama, transparency ma le accountability, full accountability ina ia malamalama uma ai lava mea uma. A fai se faiga faapena e maua ae lava tupe a le Matagaluega ia fai latou, e le mafai ona taoto i se tulaga maopoopo ma iloa lelei mea ia e faaalu ai, ona aumai loa lea i le Ofisa o Tupe, aumai lufilufi e aumai iinei i le Palemene. O lona uiga la, e aoao uma a tupe a Matagaluega, ave lea i o i le Matagaluega o Tupe faasoa mai e latou, tuu loa i totonu o le tusi lea tatou te talanoaina o le Budget, o le mea lena e faigofie ai ona iloa le mea e sau i totonu, iloa le mea e alu i fafo. Ae a nunu loa le toau i mea faapena, sao loa ma mea faaletonu. Na ona ou faapena atu aua e le mafai ona iloa atu mea e ono fai i tua ona alofia ai lea o le sau o oe i ala o mea, sau i totonu o le Palemene e oo i ai outou finagalo ma lufilufi atu ai i vaega eseese o le atunuú.

Lau Afioga i le Fofoga Fetalai, o lou fiafia lena ua laga mai e le sui usufono ona e malamalama ai vaega eseese ia, ma o le mea lena sa aumai foi e le vaega ia o le LTA. E faapefea la matou tupe ia matou te tua i ai? O le tali, e leai ni mea tou te tua i ai faalilolilo, e malama uma mea uma, e tasi lava le auala e agai i ai mea uma ma faasoasoa mai ai i ina. Ia lau Afioga, i lou faamoemoe ua manino si na mea, ae ou te faafetai i le sui usufono ua na laga, o lea ua mafai ona maua le avanoa e faamalalama atu.

**FOFOGA FETALAI:** O lea ua matau atu o lo o tulai mai le Minisita o le LTA, sina faaopoopoga?

**Susuga Hon Papaliitele Niko Lee Hang (Minisita mo Galuega, Felauaiga ma Atinae Esee):** Faafetai i lau Afioga i le Fofoga Fetalai mo le avanoa, na ona toe fia faaopoopo i le saunoaga a le Afioga i le Palemia. Ou te manatu o le isi mataupu lea e ono lagalaga mai i saunoaga a nisi foi sui usufono e le i saunoa i le Maota. O lea mataupu lau Afioga, o lea ua taatia i lumamea nei le teuteuga o le Tulafono, e aofia ai la ma vaega ia e lagalaga mai foi i le lipoti a le Komiti o Tupe Maua ma Tupe Totogi a le Palemene. Ou te manatu la e tatau ona avatu se faamatalaga i popolega ia, aua ou te manatu o popolega lava lea i le mea lea e pei ona fesiligia i tupe ia a le Pulega o le LTA, ia o lena ua saunoa atu le Afioga I le Palemia, e alu uma lava i le taga a le Malo tupe ia. A o le fuafuaga la lea ua taatia mai nei, ia transparent le faaogaina o tupe lea e faaoga e le Pulega, aemaise lava la le fesoasoani i tupe maua a le LTA e fesoasoani i le faiga o a tatou auala, a o lea e manino lava i amendments o le a alu uma lava i le Matagaluega o Tupe, tupe maua lea sa le maua e le Pulega ona o lea o le a alu mo le laiseneina o taavale ma le laiseneina o avetaavale, o le a ao uma lava la e le Ofisa o Leoleo, e alu uma a i le Treasury tupe ia o le a aoina e le Matagaluega o Leoleo. E pei o le tulaga lena, a o isi popolega ia faapea o le a maua le tau faaopoopo ona o le a saili foi i ni fale foi nei e pasia ai taavale. A o le fuafuaga lea e i ai, e toe faaoga uma lava e leoleo fale la e i ai i Upolu ma Savaii o lo o i lalo o le vaaiga a le LTA. E leai se tupe faaopoopo i le tulaga lea.

Ma isi vaega ia e popole ai le Komiti o Tupe Maua ma Tupe Totogi, o le faigata o feoiga o mea o conflict of interest e masalo e mafua mai i le aafiaga o tagata faigaluega, o lea ua tapena uma lava le tulaga lea. E pei la o le tulaga foi lele ona o le fuafuaga foi a le Matagaluega o Leoleo e toe o atu nisi e fia auauna i le Matagaluega, e auai i trainings foi nei ina ia agavaa ai ma toe maua le agavaa e mafai ai ona auauna e ave ai ma sui o malu o le Malo. Ia o lea e le i talanoaina le tatou Tulafono lea Teuteu, ae ou te talitonu e address uma ai lava tulaga ia, ae na ona faapupula atu o mataupu ia, aua ou te iloa e toe lagalaga mai i nisi saunoaga. O lea foi ua saunoa manino le Afioga i le Palemia mo le tapenaga foi o lo o tuuina mai i le tatou Tulafono Teuteu lea, e aafia ai la le faamatuu atu o isi matafaioi lea sa i lalo o le LTA i le Matagaluega lea o Leoleo.

Atonu o se faamatalaga lea e fesoasoani atu ai i le mataupu lea. Ma lou faaaloalo lava. Faafetai.

**FOFOGA FETALAI:** Ia, ua manino auofala e tusa ai o mataupu sa laga e sui usufono mamalu.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, e malamalama lelei le sui usufono lenei, sa ou faapea foi e tulai mai le Minisita e lagolagoina lea vaega ina iaí aua o le LTA, pei o le isi vaegatupe lea sa tua i ai latou aemaise lava o le Minisita lea i mea tau auala lea e masani ona lauga atu ai matou ae fai mai e le lava le tupe, a o lea la ua sau le paketi leaf

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le taua o le itu lea, ina ia silafia ai e le o nofonofo le Minisita o Galuega, o lea e taumafai e faatino uma finagalo ia e faaalia, o le ala foi lea e taua ai, aua e taoto mai loa tatou auala, ona faatulaga lea e le latou Matagaluega le faagasologa o galuega, le priority. Manatua foi la a faataoto loa priorities e faatulaga le faasologa o galuega, e le nofonofo le Minisita, e o ma lana Matagaluega ona o lea tilotilo lelei lava i auala, aua e moni o lea tou te aumaia o outou o faipule o itumalo le tulaga o auala, ae manatua foi, e tele auala sa faatino i isi Paeaiga muamua atu. E o la le Matagaluega e vaavaai ona faatulaga loa lea e latou le faasologa, ona omai loa lea ave le latou fautuaga i le Matagaluega o Tupe ina ia atoatoa, e tatau foi la i le Matagaluega o Tupe ma le Minisita, ona silasila totoa i mea ia, aua o le latou matafaioi lenei e faatulaga ai e tatau foi ona o latou e vaai. E pei la ona ou tau fesilisili atu ai i le aso ananafi i le sui usufono mo Falealili i auala ia, ona o le aumaiga o auala ia ananafi e matua tau mai ai i le tele o le faataua. A o le tele la o le faataua o auala, e tatau foi ona matou tilotilo i ai, aua e aumai outou finagalo ae le o pogisa la le Kapeneta e faatino, e matua o lelei lava tilotilo i ai i le tulaga o auala ona faataoto loa lea. E leai lava la se mea e popole ai aua afai lava e silasila le Minisita o Tupe ma i latou o lo o lagolagoina le galuega i le taua o le mea nei, o lona uiga e sau lava i ina e tele foi le vaegatupe e faataoto mai e fai ai fuafuaga. Manatua o le keke a tatou lea e faasoa, e le femeiai le keke e tumau lava le keke. A faasoa la le keke lenei, e tele loa le fasikeke a le isi laitiiti le fasikeke a le isi, ae o lea e taua uma a mea ia, o mea e tatau ona fai falemai, e tatau ona fai faleaoga, e tatau ona fai le a ma le a ma le a.

A o le tulaga la lenei, e faatoa maua le ata atoa o mea e fai, ma le tupe e tatau ona alu ina ua aumai uma tupe i totonu i i, ona lufilufi atu ai lea ma latou aumaia le fautuaga i le Kapeneta, aumai foi le fautuaga i le tatou Palemene nei e auala i la outou Komiti o Tupe. A o tatou i ai la i le Komiti o Tupe ma isi Komiti, o le taua ia o le mea lenei lau Afioga i le Fofoga Fetalai, e valaau Matagaluega e omai e fai a latou molimau. E i ai foi la ma isi e valaau i isi mataupu eseese po o mataupu e aafia ai le atunuu, e valaau e le Komiti. O le process lenei o lea e faaigoaina o le consultation i lalo o le good governance principles. Ia manatua foi o good governance principles, o auala ia e limataitaiina ai Malo, faigamalo lelei. Muamua, o Tulafono ia manino mea uma. Lua, o Tulafono ina ia aua ne i i ai se tulaga foi lea e i ai ni tulaga e le manino ai po o ai na faatinoina lea galuega a o ai foi na faatinoina lea galuega, pe sa lelei foi ona faatino ma tapena mai lipoti. O le ala lenei e taua ai le omai o Matagaluega lenei ina ia latou silafia, ia update uma lipoti, aua e leai se aoga e aumai ai se lipoti e tuai mai ae aumai ua tolu i le fa tausaga ua tea. E tatau lava ona uma le tausaga ma aumai le lipoti e silafia ai e outou le mea la ua i ai le galuega ma le tulaga o le faagasologa. O le tiute la lenei o Komiti, valaau i latou nei e omai ma isi foi sui o le atunuu. O latou la ia e omai, ua i ai lo latou talitonuga i luga o le amanaia o Tulafono a le Maota lea e limataitaiina ai galuega a latou. O a Tulafono? O Tulafono o le confidentiality, o a mataupu latou te avatua ia te outou, o la e i ai lo latou silafia. Manatua o Ofisa Sili o Pulega o Matagaluega o laua, e malamalama lelei i galuega o lo o latou faia, malamalama lelei i Tulafono e limataitaiina ai latou galuega ma molimau e aumai i luma. O la e nofo talitonu o mataupu uma latou te avatua e confidential, o lona

uiga e tou te tausia lelei i le tulaga o le faamaoni, e tou te faaaogaina ina ia aumai ai lipoti ma fautuaga i le Palemene, aua e manaomia e le Palemene lenei a outou Lipoti ina ia sao atoatoa. Ae afai la o lea e saofai ai le sui usufono na te faalataina le tulaga o le liki i fafo o mea, a o lea e avatu e fesoasoani ia te outou, lea e lipoti atu ai ia latou o le aufaigaluega, e iloa loa e latou o lea e saofai ai le faipule le faatuatuaina, le faipule e nofo ma faamama i fafo a latou fautuaga, e leai ma se CEO, leai ma se Ofisa Sili o Pulega e toe avatua ia te outou le mea moni, na o mea pepelo, mea pepelo, mea pepelo mea e avatu ia te outou. Aisea? Aua foi o la ua o latou te iloa o lea e saofai ai i totonu Iuta le faalata e faasalalau mea ia e tatau ona aumai i se tulaga faalilolilo e mafai ai ona faapea le isi Ofisa Sili o Pulega o Matagaluega, o le faaletonu lea e mafua ai le mea lea, o le Minisita e faaletonu, o le Ofisa Sili o Pulega la e i o, o lea e i ai le avetaavale o lea na te faaaogaina le taavale i tulaga faaletonu, e le mafai ona toe avatua e se Ofisa Sili o Pulega po o se tagata mai fafo se lipoti amiotonu ia te outou aua o lea e iloa o lea e solomua mai i le Komiti le le amiotonu. O le mea lenei e oa ai a outou lipoti, o le tausisi ia tatou Tulafono, o a mea e avatu ia te outou, e avatu ia outou i le tulaga e lafo atu e tou te faaaogaina, e aumai i totonu o le Palemene lenei i le tulaga o le amiotonu, ma ia aua ne i mama se lipoti i fafo. Lau Afioga i le Fofoga Fetalai, o le fesoasoani atu lenei, e taua tele mataupu ia, ua oo foi i ai ma leo i lea vaega, ona e i ai pea tulaga o lea e oo mai ai fautuaga a outou ia te au mai aso ua tuanai. E fiu e valaau le isi CEO e le sau, ae tuli mai le vaega foi lea i lalo. O le isi lenei auala e le fia o mai ai ni CEOs, ona e iloa e fia o mai e aumai faamatalaga, e taua mo la outou faatofalaiga. Ae o le faalavelave o lea e saofai ai ma isi i totonu i i, e o faasalalau a latou molimau ona ono aafia ai lea i le Tulafono. Lau Afioga i le Fofoga Fetalai, o le tulaga lenei ina ia faataua foi e a outou Komiti ia lipoti e o mai molimai ma avatu. E le gata o le aufaigaluega a le Malo ao tagata lautele. E le iloa foi pe tasi lenei auala e le fia ai a tatou Komiti e valaau tagata lautele e o mai e fai a latou molimau, ae le o mai, ona o le tulaga lenei, latou te iloa lelei. A faali so latou taofi, e i ai a le e alu foi faasalalau, aemaise pe a totagi tupe e ni nusipepa. Manuia la tatou Fonotaga.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai...e na o sina mea lava e faamalamalama. Leaga e agai tonu mai lava ia te au le saunoaga lea. Lau Afioga i le Fofoga Fetalai, o lo o manino lava le Tulafono a le Tulafono Tumau a le Maota. O le taimi lava e o mai ai i i.....o le a le mea e ala ai ona laga faamatalaga, tasi lea fautuaga.....i le Palemia ma lana faigamalo, aua le nanaina, aua le faapogisaina le atunuu. E tatau ona malamalama le atunuu i mea ia.

**FOFOGA FETALAI:** Alala mai i lalo le sui usufono.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e toe pau lava lea o le tulaga.....o le mea e fia faasao..... Lau Afioga o le mea e fai faasao, ou te le i taua se igoa o se sui. Ae o lea ou te manatu nei, o ia lava na alu ma faasalalau o ia lea, na sui lana Komiti ua nofo ma faamama mea i fafo. O ia lava na nofo ma faasalalau. E le o se isi.

**FOFOGA FETALAI:** O le saunoaga a le Palemia, e faamalamalama galuega ia ma le afifio ma le tala mai o aao o Ofisa Sili o Matagaluega ma Faalapotopotoga a le Malo, i Komiti eseese, ia malupuipua a latou fautuaga ma a latou lipoti e tuuina mai i le Komiti. E le faakagego ia tulaga ma e le tiu talaloa foi i le tulaga o le malupuipua. O a tatou Tulafono na. E le mafai ona mama i tua i le tulaga o fautuaga ma molimau e tuuina mai e Ofisa Sili o Pulega o Matagaluega ma Faalapotopotoga a le Malo, pe a amia e le Komiti. E aoga e le faapitoa manu i le Komiti o Tupe, a o Komiti uma a le Palemene, ia tausisia le tulaga lena o le malupuipua. O molimau ma lipoti e tuuina mai e Ofisa Sili o Pulega o Matagaluega ma so o se Samoa e sau e aumai se molimau i la outou.....i se Tulafono Tau Faaofi, po o le a lava o lo o feagai ma le Komiti a le Palemene. E aoga le saunoaga e faalauaitale le tulaga lea. E le mo na o le Komiti o Tupe ae aoga mo Komiti uma a le Palemene. O le sui usufono foi o lo o saunoa nei o le Vaimauga, ua afu le soifua o tautua i le Malo, o lo o manino. E po o fea lava e agai i ai e tasi lava le faamalu. E tele lava magavai ae tasi lava le mata o le vai ma le faamalu, o le Malo, o le Matagaluega o Tupe.

Tulai mai lau Afioga e faaauau le saunoaga.

**Afioga SULAMANAIA FETAIAI TAUILILI TUIVASA:** E i ai lou atalii ua valaau i ai le Atua, na tagatavaleina foi e nisi foi le taupulea. A uma Fonotaga nei a le tatou Malo, ona ou alu atu lea i lou atalii, fai mai si ou atalii ia te au, "dad na pa se pomu", ou fai atu, ioe na pa le pomu. E lauga loa lou tama pa le pomu. A lea ua pa le pomu i le Palemia ma le sui o le Itu Agai.

Lau Afioga i le Fofoga Fetalai, o le Tala o le Tupe lea e aumai, o lo o matauina ai foi i totonu, le tele o avanoa o Matagaluega a le Malo e le o faatumuina. O le tele ia, o ai e tuuaia? O le mea lea na i ai na faifai mai tagata i le tatou Faigamalo, ona o faiga faavae. A faapea o le PSC, o le a le mea e le faavavevave ai ona faasalalau avanoa. Po o Ofisa Sili o Pulega, o isi Matagaluega po o le Ofisa o Aoga e selau limasefulu. Oka, a o lea e fia manaomia e o tatou tagata tupe maua e faatino ai auaunaga. O le ala lea a outou Afioga i Minisita aemaise foi o Ofisa Sili o Pulega o Matagaluega a le Malo, faavavevave le auaunaga. O le mea lena o lea e inaina ai le taitai lea. E tumu ai foi le atunuu e o i ai, ona o le a? E le o faatinoa foi la outou pitolaau o outou o Minisita. O lea seiloga lava e o tagata i luga i le Palemia faatoa.....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le mea e fia faasao...

**FOFOGA FETALAI:** Malie lau sui usufono mo Vaimauga. Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E le o se mataupu fou le mataupu lenei, sa laga foi ia tatou Fonotaga talu ai, ia le mataupu lea o le faasalalau o avanoa e le faatumua. O le tulaga lea e i ai lo tatou Malo, o lo o tupu pea tupu pea ia galuega a fai. E i ai foi isi faaopoopoga o tagata faigaluega i le tausaga lenei, e



faapena foi i le tausaga fou. E tupu pea, ma e manaomia ai ni tagata faigaluega. Ae o le a agai i ai lau upu mulimuli, ae na o se fesoasoani atu.

E i ai i latou e talosaga i avanoa, e le faapea e leai ni tagata e talosaga. Ae o le faatulagaga o avanoa nei, e i ai ma tiute manaomia ma tomai manaomia. Aemaise lava la i tulaga mauualuluga ia ua oo i ai. E le mafai ona soona tuua i ai ni tagata faaletonu. O le ala lena e i ai taimi e faasalalau ai, ae ua le iloa pe toalima ea pe toaono, ia avanoa o Ofisa Sili, e leai lava ma nisi na o le taitoatasi na tusi talosaga i ai. Ae i ai le mafuaaga, o le mafuaaga o la lava e iloa e isi, e mafua ona le talosaga ona e le qualify o le latou lava lena manatu e le agavaa. O le tulaga lena, e alu i luga o agavaa, o le poto masani, agavaa i le faatinoga o galuega, faapena ma pasi sa aoga ai. E i ai le isi avanoa o le avanoa o le isi Faatonusili, e feoloolo lava tagata sa talosaga. Ae avatu i le Kapeneta ou tilotilo atu i ai, e i ai ma le isi tagata faatoa faauu faatoa foi mai, e le i i ai se poto masani i le faatinoga o galuega. O le mafuaaga lena, e le mafai ona soona tuuina i totonu, i latou o lea e valaau. O e foi e filifili e le tatou PSC e faia talanoaga o avanoa nei, e le o ni tagata faaletonu. Ona aumai foi lea i le Kapeneta, aua e masani lava pe toatolu pe toafa, e faia le faatalanoaga. Ona aumai lea i totonu o le Kapeneta, manatua la e toatolu la e fai le faatalanoaga ae toa sefulutolu lea e saofafai atu i totonu o le Kapeneta, o isi foi tagata sa taitaia foi ia Matagaluega ma isi Faalapotopotoga e pei o Pisinisi ma mea faapena. E le o ni tagata faaletonu lea e saofafai atu i totonu o le Kapeneta.

O le tele lava la pe a ma le 90% o fautuaga e aumai i lalo e aumai lava talia. E i ai la le 10% e ono malamalama lelei i ai le Kapeneta i se mataupu, po o ni mataupu e le i oo i ai ni suesuega a le panel, ona sui ai lea i ina e le Kapeneta ia faaiuga. Ae o le eseese o le tasi ma le lua ma le tolu, e manifi lava, ways are play difference. E tai pei o le manifi o le tafi lea e sele ai le ava se i tulou, o le matua manifi lava. E soo se isi lava o i latou, e mafai ona faatinoina le galuega ae taumafai lava le Kapeneta ina ia silasila totoa, vaai totoa i le fautuaga lea e aumai ma agavaa o i latou o lea e aumai. Lau Afioga i le Fofoga Fetalai, o le tulaga lena, e i ai isi e matua lelei le tulaga o pasi, lelei ma mauualuga le agavaa, ae i ai lava ni nai mea faaletonu. E faaletonu le commonsense lea sa taua i le aso ananafi. Pe i ai nai ona ila, e le i oo i ai le faatofalaiga a le Komiti ae o lea e silafia lelei e le Kapeneta. Lau Afioga i le Fofoga Fetalai, e pei o le tulaga lena, e le o se lape la i le Malo, ao le tulaga o tagata o lea e i ai e le talafegai ma galuega o lo o faatino. Masalo po o le isi lua tausaga tolu tausaga, ona talosaga mai lea, ona maua loa lea o le tulaga lea. E i ai le isi, o la e faamasino nei, ae na ma talanoa i le taaloga o le ta polo. Fai mai lea o le saunoaga a le sui, "se e faafitu ea pe faavalu ona ou talosaga, o au ua ou manatu ai po o le mea, o i ai se faiga faale lelei, na ou talosaga i le Ofisa Sili o lea Matagaluega. Ae o lea ua piki au, ou te Ofisa Sili o Pulega i le Matagaluega lea, ua ou tilotilo atu, e sao lelei le Komiti lea na faufautua, o lea ua ou iloa e au o lea faatoa ou agavaa".

Lau Afioga i le Fofoga Fetalai, o le tulaga lena e le faigofie lenei mea o filifiliga. Sa laga muamua foi, ae tele lava mau mataupu. Se ta te musu.....masalo pe atoa le vaiaso o talatalanoa atu i mau lavelave eseese e aafia ai faaiuga e tatau ona silasila totoa i ai le PSC, o le panel po o le Komiti lea latou te faatalanoaina, faapena ma le Kapeneta pe a oo mai. Ona faatoa fai ai lea o le faaiuga. E i ai le isi tofiga a le isi faalapotopotoga tele lea e i ai nei, e faafa lelei ona aumai le fautuaga ma toe

fiki i tua, ona aumai le fautuaga ae o lea e iloa lelei e le Kapeneta, le faaletonu lea na aumai toe fiki i tua. E faafa lelei ona fai, faatoa sau ai loa lea tilotilo atu le Kapeneta, o le tagata tonu lea o lea e manaomia e le Kapeneta. Lau Afioga i le Fofoga Fetalai, o la la ua galue ai nei, o le matua lelei lava.

Lau Afioga i le Fofoga Fetalai, o le tulaga lena, o le filifiliga e le faigofie.

**FOFOGA FETALAI:** Malo. O lena ua.....ona o lea e tulai mai le.....sei tuu atu muamua le avanoa i le Minisita.

**Susuga Hon Papaliitele Niko Lee Hang:** Faafetai mo le avanoa lau Afioga. E na ona fia malamalama lava i le saunoaga a le sui mamalu. O lea e matau atu ua amata ona ote mai ia matou nei o Minsita. E le o malamalama la lou Minisita po o le a tonu lava....o lea ua saunoa le Afioga i le Palemia, masalo la o le tulaga lea o tagata faigaluega. Ae o lea e pei o lea e faasaga mai le ote ia matou. O lea la ou te fia malamalama. A faapea o lea o le a amata ona pomu mai matou i au pomu, ae se i faasao mai lau saunoaga ia i matou. O lea foi e fesiligia e nai Minisita ia po o ai tonu ia e faasaga i ai lau lauga, faamolemole faafetai.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi:** Ua tulai mai le Minisita, o mataupu uma lava e fitoionu i lea Minisita ma lea Minisita. Ia te au lava ia o la e faatino i le atoatoa. E i ai foi taimi e mai lava i le amataga talu ona ou tulai mai e avea ai ma Minisita, fai ai ma fai fetuunaiga foi a le Afioga i le Tootoalii, mai i lea taimi i lea taimi. E faapena aga o.....e le pitoa la ia Samoa, e faapena foi i atunuu i fafo. O isi fetuunaiga o le tofi e fai toeitiiti lava oo i le taimi e fai ai faigapalota. Ae ou te faafetai i le Afioga i le Tootoalii, i na faiga na fai i na ona aso, ua tele ai lou avanoa e faalautele ai lou malamalama i lea Matagaluega ma lea Matagaluega ma lea Matagaluega sa fetuunai ai tofi ma ou galue ai.

O le taimi na tofia ai au i le tausaga i le 1991 e avea ma Minisita mo Turisi, faatoa ou malamalama ai foi lea i mea faaturisi. Na ona tofi lava o au ou alu ai lea i Fiti i le fono faaturisi. Ou te alu atu ua taufua mai ia Tutuila, ua fai soo lava le tala lea, oi ia Fiti, ona ou fesili lea po o a ia mea? Ae fai mai o le latou festival.

Ia na ou foi mai lava fai mai oi lea oi lea na o le faaaoga faaaoga nei Malo e i ai foi le festival a Hawaii, Tahiti e faaaoga ai fugalaau eseese. Ia ona ou foi mai loa laia lea, fautuaina le Kapeneta ina ia filifili se tatou fugalaau e iloa ai Samoa, lea na filifili ai le teuila. Ia outou manatua foi o Niu Sila o le latou fugalaau e iloa ai Niu Sila e le o se fugalaau ae o le siusiu o le olioli, o le lau olioli. Lea la e tou te vaai a oo i le taimi e taaalo ai le All Blacks e o mai e tou te vaai atu e tu mai i le pito o le ofu ia le ata o le laulaau o le olioli.

O isi atunuu e faaaoga le aute, o isi atunuu e faaaoga le mosooi. O tatou la na tatou filifilia le teuila ma le mosooi. Ia ona uma ane lea, tatou ua lafoaiina lau mataupu i totonu ae ato i tua e Tofilau ma le Kapeneta ia le mosooi ona e le umi ae vaai atu ua mamae. E moomia e tatou ia se fugalaau e umi ona lelei. Ia ona tatou lafoaia lea ae faalogo atu ua apo e Tutuila faataitai mai foi Tutuila latou ma le faigamalo, ua fai foi ma faataitai mai foi latou.

Ia o nai mea la na sa fai ma ou sao, semeamanu e oo mai nei e leai se Teuila. Ia ae ua ou alu atu kopi mai i Fiti, ia o le lalolagi lenei mo mea o le lalolagi e

fekopiai. Tatou te o atu kopi mai mea lelei mai lea atunuu ma aumai fai ai le tatou Malo. Ia o le tulaga lena lau Afioga i le Fofoga Fetalai, ina ia manino ai ia lea vaega i le tau faamalamalamaina o mataupu i le fesuaiga o tofi, lea la ua faigofie ia te au ona ou malamalama i lea mea ma lea mea ona o fesuaiga o tofi. O le isi lea vaega o le fesuaiga o tofi, e faalatele ai le malamalama, o le upu foi lea, variety is the spice of life. Ae o le eseese o mea fou e te faafeagai ma oe, ia o le suamalie lena i le soifua.

Lau Afioga i le Fofoga Fetalai, ia o le faamatalaga lena te i foi ua toe sau ai se manatu ae o le mafuaaga lena ea ala ai ona ave lau faatuatuga i Minisita. Po o le a lo outou vaai mai foi, leai o uiga na o faatinoga o galuega a le Malo. A i ai le Minisita e alu i fafo, ia ona ou tauavea lea o tofi. E mafua ona ou faia le mea lena, ina ia ou malamalama ai, i le mamafa o le avega lea e tauave e le Minisita, fesoasoani ai lea ia te au e fetuunai ia tofi, ia faamama isi tofiga ia ua mamafatu, i le isi Minisita ae tau faasoaso mai i isi Minisita.

Lau Afioga i le Fofoga Fetalai e pei o mea na o lea ou te tau matau atu e le o malamalama i ai ia outou, i faiga faa-Kapeneta o lo o faatino ai. E le o ni faiga fou o la foi e fai e le tele o atunuu o le lalolagi.

**FOFOGA FETALAI:** Ia se i tulai mai le sui usufono o Palauli le Falefa.

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai, o le fesili a le sui usufono mamalu o lo o saunoa nei, i mea o avanoa, avanoa e le faatumuina. O Matagaluega leaga lea sa taua ia le Matagaluega o Aoga, o le Matagaluega o Aoga, e 150 avanoa a o faiaoga. O le faigata ia ona faatumu, e na o le 2 pe 3 avanoa o le administration, a o avanoa foi na, e a foi lea, e pei o mea lea ua ou tau.... leaga e tasi lea vaega taua o le faatalanoaina, i le taimi e faatumu ai ia avanoa.

Ma o le staffing table lea sa aumai faatasi ma le Tala o le Tupe, e 4 po o le 5 vaiaso a o le i faia ia le faatalanoaga o ia avanoa. O le faamatalaga a Ofisa Sili o Pulega o Matagaluega, o le tele o avanoa ia, ua faatumuina. O le isi Matagaluega tele avanoa o lo o i ai, o le Matagaluega o le Falemai. Ae o le faamatalaga foi a Ofisa Sili, o lo o i ai avanoa ona o le tuufaatasiga. O lona uiga, e i ai ia galuega e ono felaasai, o lo o fai le review, ia faatasi ai ma i latou o lo o aoga i le NUS e faatumuina le tele o avanoa ia.

A o le lautele lava o avanoa, lau Afioga i le Fofoga o le Fono, e a foi lea ua faatumuina. E i ai foi isi Matagaluega ua amata ona vaavaai e toe faatulaga a latou galuega, po o toe moomia ia galuega pe leai o le faasaoina o tupe ma lou faaaloalo lava.

**FOFOGA FETALAI:** Ia malo.

**Afioga Hon Loau Sola Keneti Sio (Minisita o Aoga, Taaloga ma Aganuu):** Lau Afioga i le Fofoga Fetalai....

**FOFOGA FETALAI:** Ia se i tulai mai le Minisita mo Aoga.

**Afioga Hon Loau Sola Keneti Sio:** Ia na ou tulai atu lava e faamalamalama atili o lena ua saunoa atu mai ia le Sui Taitaifono o le Komiti o Tupe. Ia masalo o le auga lea, o lea e taua le fuainumera e 150, ia e pei o se fuainumera tele, ae o le auga atoa lena. A tou matau foi o lea e pisapisao foi ia lo tatou atunuu i le tulaga lea e faapea o le lelava o faiaoga, shortage of teachers, ia o avanoa la lea, ae o le Primary School. A matau i le Primary School e 8 vasega, ia o le isi Primary School i le taimi nei o la e 4 faiaoga, o lona uiga e na o le 4 faiaoga ae 8 vasega. O lena la e avanoa le 4, o lo o tilotilo foi la i ai ina ia mafai ona faatumu le tulaga lea.

O le isi mea o a tatou faiaoga foi ia e iu mai i uta i le NUS, e tele ina fai ia latou faauuga ia Aperila. Ia ua uma le Tala o le Tupe e tatau foi la ona tuu i totonu o le Paketi ina ia faapena ona i ai ia le tupe lena e faalagolago i le tologiina o faiaoga ia. E pei o le agaga lena, ae faafetai i le Afioga i le Sui Taitaifono o le Komiti o Tupe i le faamalamalamaga atili o le tulaga e pei ona taua e le sui usufono, ma le agaga faaaloalo.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr Sailele Malielegaoui:** Lau Afioga i le Fofoga Fetalai, se e i ai lava nai vaega foi lea e fesoasoani atili i le mataupu lea. Faafetai ua laga mai e le sui usufono, po o le a lava le tulaga o lo o laga mai ai, a o le taua o le faatupu manatu.

E i ai le isi tagata Sinia o le isi Matagaluega e uma loa lava lana tiute, ona leai lea o sana mea e fai. Ia lea la na faatonu atu lea, a uma loa lau galuega lea e faatino e oe, ona e sau loa lea e te alu e faaoga lou avanoa lea i le isi 5 pe 6 itula o le aso e te fesoasoani ai e faatino isi galuega e te agavaa e fai. E fai atu i ai i le Ofisa Sinia lea, ae tee le Ofisa Sinia lea, leai ou te alu lava e fai ia lau galuega lea na tuu mai ia te au e fai.

O le faamatalaga lea e tau fesoasoani atu, tasi lea auala e mafua ai ona tau taofiofi atu, e le PSC ia Matagaluega. I le tupu ae lava o le manatu ona faapea lea ua moomia le mea lea e fai e manaomia ia ni tagata se toafa. O la e i ai le avanoa i le PSC e toe fautua ai i le Ofisa Sili o Pulega o le Matagaluega, e taumafai e tilotilo outou i tiute o Officials ia e i ai nei e tufa i ai na avanoa, nai lo o le tau faasalalau, ae o la e i ai avanoa o isi e le o faapea o galulue i le 8 itula o le aso. E le o faapea o pisi i le 8 itula o le aso.

Ae lau Afioga i le Fofoga Fetalai o le tulaga lena e tele lava le fact lea e i totonu o Matagaluega e tatau ona silasila totoa i ai ma o i ina e iloa ai le Ofisa Sili e ala. O le tilotilo a vaai atu i le tulaga o la e i ai isi e tatau ona faaoga, o mai i i e faaoga. Ma o le mea foi lena e masani ou talanoa ai i le Minisita mo Falemai, e pei lelei foi ona fai ma savalivali ane ma le Pule, savalivali ane e te vaavaai i le outpatient, ona e i ai taimi e oo ai i le toa 50 toa 100 tagata lea e fia o e vaai le fomai. Ae afai la e nao le tasi le fomai la e i ai, a o fea isi mau fomai, e tatau ona vaai atu loa e toatele tagata, 2, 3, 4 fomai e o ane e lagolago.

Ia o le ala foi lena o lea sa fai ai le polokalame lea a le falemai e tau avatu ia fomai i tua, e fesoasoani i le tulaga lea. Ae o atu foi fomai i tua, ia o isi e tea le taimi e tatau ona o atu ai ae faatoa o atu. Ia e le umi na galue, ae fai latou malologa fai mai e tatau lava ona malolo. O lona uiga ua alu le aso atoa pisi foi ia latou galuega i tua, ia ona o atu foi laia, ona faapena ona faifaiga foi i le

faatinoga o a latou foi galuega i totonu ae o lea ua maua mai le avanoa e faaoga ai ia o latou tagata.

Lau Afioga i le Fofoga Fetalai, e tele lava ia nai mau faafitauli ia e tulai mai, o lea e tau faasoa i ai e Minisita ma Ofisa Sili o Pulega o Matagaluega ia resources ia o lo o i ai i totonu, ina ia faaoga tatau. Ae taua lava ia le tou aumaia, ia o le isi lea independent source e malamalama ai foi le Minisita ma faatalatalanoa ai pea ma lana Matagaluega.

**FOFOGA FETALAI:** Malo faafetai, ia e faalagolago lava i le tofamamao, e fetuutuunai i le tulaga o lo o i ai, e le avea foi le naunau e faatumu avanoa, ia ae o le tulaga lena e pei ona saunoa faamalamalama le Afioga i le Palemia. Ia ae tulai mai le sui usufono o Vaimauga.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai ona o le taua o lenei taeao ma le lauga a lenei itumalo. E manatu le sui usufono, ia e pei o le tama lea o Elia ma Elisaia, sa taumulimuli lava le tama lea o Elisaia ia Elia i faamanuiaga, ia e le o po se lilo, o lea na faamanuia i ai ae le i alu Elia i luga sa aumai i ai ia faamanuiaga. E pei o le ala lena e meemea ai lenei itumalo ona o lea e tau matau atu o le tele o le taimi... le aanoa o le faauuga o lenei itumalo.

O lea e matau atu pei ua... ae o le faanoanoaga, o lea e lauga atu i o i le Palemia a lea e toe tali mai lea itu. Leai, taatia pea, o le lauga a le Vaimauga o le mea tele. O lea e vaai i le lautele, fautuaga ae le o vaai o lea sa faaitaitai ai i le Matagaluega a Loau, o le Matagaluega. Ae lauga le Vaimauga o le mea tele lea e fai atu ai, o le aotelega o le Tala o le Tupe.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Lau Afioga i le Fofoga Fetalai...

**FOFOGA FETALAI:** Se i onosai le sui usufono, tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Masalo ua galo i le sui usufono o saunoa nei, o le afioga i le sui usufono lea sa saunoa, o le matua laua lava o laua. A foi e tolu nofoaiga o Minisita, Minisita tonu lava i mea ia tupe, Matagaluega mo Galuega ma le Siosiomaga, Matagaluega tetele ia a le Malo sa Minisita ai le Afioga i le sui usufono, lea sa tau fesoasoani mai, lea foi la e i totonu o le Komiti, o lea e tele lona sao i lona foi Komiti. I le tulaga la e pei ua ou vaai atu ua e tau faagaulemalie i i, o le mea lea e tatau ona e faia, e tatau ona e faafetai i le sui usufono, o lea ua tulai atu, e le o se sui usufono e faaletonu, o le matua toeaina lava o toeaina lea na tali atu ia te oe. E fesoasoani atu ia te oe, o oe o lona uso a sui usufono o le Itu Agai o le tatou vaega. Ia e tatau ona e faafetai i ai ae le tatau ona e sai.

**FOFOGA FETALAI:** Se i tulai mai le sui usufono o Vaimauga, o le lapataiga foi a le nofoa le sui usufono mamalu, se fai fuafua ia le feaveai o ou aao ua tali lavea ia fofoga o sui usufono o Siumu ma le sui usufono o Nuu Tu Taulaga.

**Afioga SULAMANAIA FETAIAI TAUILILI TUIVASA:** Ia leaga foi e pule lava au o ou eleele ia ou te lauga ai. Lau Afioga i le Fofoga Fetalai e manaia le saunoaga a le Taitai, e faatatau i le tamaoaiga ia ma le sosia sa faaeaea ai foi i le sui usufono nei. Ae o le faalavelave e manaia le amataga ae leaga ia le faaiuga, o lea sa faalogo, ia o le fesili a le Minisita lea o Felauaiga, e lagona le...

**FOFOGA FETALAI:** Ia, se i toe tulai mai le sui usufono mo Palauli le Falefa.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, o le tala foi lea ia Iosefa, na fai lana miti, na faaali i ai e le Atua e alu i luga, ae sauni e le Atua ina ia matua alu i lalo. O lona uiga, a vaai faaletagata, o la e sauni oe e le Atua mo mea tetele i le lumanai. Ma lou faaaloalo lava.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, o le saunoaga a le Minisita lea o Felauaiga, po o ai le Minisita lea, o lau Afioga lea e faatatau i ai, leaga sa e saunoa i le Maota lenei, e faapea le tele o le lisi a le Itumalo lenei o le a e kolosia. O le ala lena o lea e matau atu lenei itumalo e leai ma se mea ua faatinoina mai lena taimi e oo mai i le taimi lenei.

**FOFOGA FETALAI:** Se i tulai mai le Minisita mo Galuega, Felauaiga ma Atinae Eseeese.

**Susuga Hon Papaliitele Niko Lee Hang:** Lau Afioga o se mea e fia faasao, leaga o lea e faalogo atu e pei o le aotelega o le ote a le Afioga i le sui usufono mamalu. O la e fia malamalama ina ia mafai ona tali atu lava le Minisita lea e te faasea mai i ai, o la e manino ua e saunoa mai o au. Ia o lea lava e fai tapenaga o lou auala e te tatalo mai i ai, a o lea o ua vaai atu nei o lea o le a ave sao lava i le Kapeneta pe priority lou auala ona faatino lea, ae leaga o lea ua i ai foi le suiga i le faiga o auala, ae o lea o le a tuu pea i lalo o lau lisi, ona o lea ua e tuuaia au i au galuega, a o lea lava e tapena atu le galuega mo lou Itumalo. O lea ou te fuafua o le Tala o le Tupe lea e faatino ai a ua le lava lou onosai. A o lea faafetai o au lea e te saunoa sao mai i ai, taatia la isi afioga i Minisita e le o latou, ae faafetai o lea ua manino le mata o le vai. Ma lou faaaloalo lava.

**Afioga SULAMANAIA FETAIAI TAUILILI TUIVASA:** Pei lava la ona avatu manatu i lau Afioga, sa tatau ona e lagolagoina, aua le aveesea le Matagaluega o le LTA lea e maua ai lau tupe lea ua toe foi mai i leoleo, ina ia tele ai le mea i lau taga e faatino ai. Ae ui i lea, ona o lea ua tele le matou talanoa ma faauilavea i le Tala o le Tupe ae le i oo sau tala i si ou itumalo i galuega atiaie.

**FOFOGA FETALAI:** Ia, faauma mai loa le saunoaga a le sui usufono toe lua ou minute.

**Afioga SULAMANAIA FETAIAI TAUILILI TUIVASA:** Sole e leai. Lau Afioga i le Fofoga Fetalai, e tele a mea sa ta fia talanoa i ai e pei o le saunoaga a le Afioga i le Palemia...

**Susuga Hon Papaliitele Niko Lee Hang:** Na o si mea lava lea faamolemole lau Afioga se i faasao pea le tuuaiga a le sui usufono mamalu, ou te le o auai i ai i le mea lea, ona o lou foi talitonuga lena ona o tupe ia o le a le maua e fesoasoani pe a uma le paketi e fai ai la auala ia e talosaga mai ai a outou Afioga, ae le faia e au se faaiuga o le mataupu, o la ua teuteu le Tulafono tuuina mai i le Palemene mo sana iloiloga foi pe a aulia le aso e talanoa ai, a o le naunautaiga lava lena. Ae peitai, o tupe lava ia o tupe e tasi e alu uma a i le Matagaluega o Tupe, faasoa mai e faatino ai galuega ia e masani ona faatino e le LTA. E leai a la se mea tatou te popole ai. A alu alu foi ua uma mai tupe o le paketi ua le maua se tupe a le LTA, o lea e maua le avanoa, e ave sao lava la i le Minisita o Tupe le talosaga ma faatupe pe a faapea e tataua ona faatino galuega ia. Ma lou faaaloalo lava lau Afioga.

**FOFOGA FETALAI:** Faafetai. Ia faaiu mai loa le saunoaga a le sui usufono mamalu mo Vaimauga Sasae.

**Afioga SULAMANAIA FETAIAI TAUILIILI TUIVASA:** Se ou te ofo Pulemagafa i lau faaiuga, ae ui i lea, pei lava ona ou fai atu e tumu le sui usufono lenei i le faaaloalo. O le tulaga i le tatou faigamalo, e pei lava o lea ua saunoa le Afioga i le Minisita, o lenei lava itumalo i ona auala galue o lo o mafai, aemaise foi o auala i le lotoifale lava ia, ua matua leaga faia lava. O lea e tuualalo atu ai e faaaloalo atu ai foi ia te oe aua o lea o le a e sau i le ta itumalo o le Vaimauga, ia se i alofa ane pe faatuai auala galue, a o auala ia i totonu lava o le lotoifale o nuu ia o Vailele, Fagalii, Letogo. Ia se i...

**FOFOGA FETALAI:** Ia se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoui:** Lau Afioga i le Fofoga Fetalai, sa le tataua ona faalupea lau Afioga o Pulemagafa, o oe o le Fofoga Fetalai, o lea la ua aliali mai nei le mafuaaga, na lauga mai lava i le ta o le 9:00 lea la ua oo nei ina fai le tatou break o lea e lauga. O le a ea le vaiaso e faauma ai le lauga a...

**FOFOGA FETALAI:** Ia ua silasila la i ai le sui usufono, ua maua taua talu ai oe. Ia, faamaea maia le saunoaga a le sui usufono.

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai, e momoli atu le agaga faafetai ua tele foi atinae a lenei itumalo sa fia talanoa i ai aemaise lava nai ou fanua, o lea lava e taliga se talosaga foi ma se ioega mai le Minisita o le Samoa Land, ina ia toe iloilo le tau o fanua o si o matou itumalo. Ae masalo ona o lea ua faalava le amoa, e tele lava mea sa ta fia talanoa i ai e pei o le saunoaga foi a le Palemia i tulaga i Ofisa Sili o Pulega o Matagaluega a le Malo, ia na ona tuualalo atu i a outou Afioga, se i alofagia faiga faaiuga ma faiga faavae o lo o aafia ai tamalii foi o si o tatou atunuu o lo o ave i ai le faatuatuaga. Ia o nisi o tamalii e oo mai i le taimi lenei e le o maua ni iuga o faamasinoga, a o lea lava ua o i faaiuga a le tatou Palemene aemaise foi ole PSC i

nisi o tamalii sa faauluulu i ai le Matagaluega. O le tatalo a lenei sui usufono se i alofagia, e tatalo atu o tamalii o le atunuu e tua i ai tatou, e lima ma vae i ai le tatou faigamalo. A o le popolega, ina ne i toe foi mai ni sue aafia ai le tatou faigamalo e ala i a outou faaiuga ma tou filifiliga fai. O tamalii o le atunuu e matuai tumu i le agavaa, e i ai le tamaoaiga i aoaoga i fafo ua foi mai e tautua si o tatou Malo, ia ae o le lave lea, e pei e faapena se vaai. O lea foi na malele le Afioga i le Palemia i le faiga o faaiuga e filifili ai sui usufono, ae pei o au lea ou te i lalo o le level lea e close i Ofisa Sili o Pulega. O nisi e ala ona le apalai, fai mai e le favour i le Minisita i le la va ma le Minisita. E fiu lava la e apalai e le pikia e le Minisita. Se i silasila ane i lea tulaga. O tatou ia na o le lima lava tausaga, a o le atunuu o lo o omai e tautua, e tatau foi ona tatou amanaiaina le tautua a le atunuu. E i ai lava le Matagaluega e le mafai ona tuu i lalo sa ta faafetai...

**FOFOGA FETALAI:** Ia se i tulai mai leaga e matuia le saunoaga a le sui usufono. Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi:** Lau Afioga i le Fofoga Fetalai, na pau lava lea o le mea e ao ona ou faasaoina, a uma le faatalanoaga, ona aumai loa lea i le vaatele i totonu o le Kapeneta ona fai lea o le iuga a le Kapeneta. E fai foi si feooloo o faaiuga a le Kapeneta e le faia ai e le Kapeneta le mea lea e manao i ai le Minisita, ona ua silasila le Kapeneta i le malolosi o mau tusitusia na avatu i le lipoti o faatalanoaga, atoa ai foi ma le silafia e Minisita o le Kapeneta le tulaga o lea tagata na talosaga ma lea tagata na talosaga ma lana ia foi tautua. Ia manatua foi o Samoa lenei tatou te i ai, toetiiti lava leai se isi e le... e iloa uma a e tagata le toatele i totonu o le service ma le faamaoni o le tautua.

Lau Afioga i le Fofoga Fetalai, o le fesoasoani atu lena leaga o lea e matuia le lafoga lea e aumai, e te fiu lava e manao, ae a musu lava le Minisita e tofi oe e le tofia oe. O le ala lena e ala ai ona aiaia e le Kapeneta e aumai i totonu o le vaatele e fai ai le faaiuga ina ia le faapito augafa i tua e le Minisita ma sao ai la mea ia e saunoa i ai le sui usufono.

**FOFOGA FETALAI:** Malo faafetai. Ia leaga e matuia le saunoaga a le sui usufono. Ia, ma ua faapena ona faamalamalama. Ia o lou lava lena finagalo, ae le o faapena se mea o tulai mai. O le mea la lea ou te faamalie atu i le sui usufono ua maea lou taimi.

**Afioga SULAMANAIA FETAIAI TAUILILI TUIVASA:** Faafetai o lea o le a faauma atu le matou... Faafetai Loau, e le mafai ona tuu i lalo foi lenei Nofoa e le i avatu se matou faafetai i le tulaga foi i lou tulai mai, e le o po se lilo ua pisi ai si o tatou atunuu i tatou taaloga. Ia o ou mama na i le tulaga foi o taligamalo ma ua ou vaai foi i le lagolago a le atunuu i le tulaga ua tulai mai ua oo lava i nuu i tua i le teuteuina o faleaoga ma mea uma, o i lea e aumai ai le lagolago a le atunuu i tatou taligamalo ma le tatou faigamalo lenei. Faamalo o le tulaga sa i ai o mea na sa faatino e alii ma faipule e ala i le Minisita, ae ua ou vaai i le mea lea, ua



oo i nuu i tua e pei lava o la e ua o atu atunuu ia e omai i fafo i nuu i tua. Ia se i alofa ane ma tuu i ai nai seleni i nai aoga ia.

Ia, a o se lagona lava faagaetia ou te faafetai i le Ofisa Sili lea o Faiga Palota, o i lea pei ua amatamea ai le tatou Paeaiga lenei i le malupuipua o le faiga palota lea e ala i le Komesina o Faiga Palota. E momoli ai lata ita faafetai ona e fiu lava tatou e fau Tulafono ae a omai lava i latou e talepe Tulafono ma e tele tupe i le faatinoga o nei mea o faiga palota, e le malu a le tulaga i Tulafono ia. Ae ou te faafetai lava i le Komesina ma le Pulega o le Palota, o lea ua amatamea ai lea foi itumalo. Ia faafetai i le Atua, o lata ita faafetai lea.

A o lenei itula e momoli atu le faafetai i lau Afioga i le taitaiga o le Maota, o le a foi se gagana a lenei itumalo ua paopapa, ia foi mai, foi mai i lenei itumalo. Ae tatalo i le Atua e faafualoa lou soifua aua le taitaiga o le sa o le atunuu.

Lau Afioga i le Palemia ma lau Kapeneta, ia o outou mama na. O lea e tele sui usufono na faamanuia atu i lau Afioga i lau taaloga lea i le Pasefika lea e faia i i nei, a o le sui usufono lenei, ou te le tapuaia lau taaloga, ou te mana'o e te alu i fafo i le World Cup, fafo, e le o totonu o le lotoifale lenei, e te fana i fafo e alu atu ai ma le sui usufono o Vaimauga e uua lau fana au e alu ai. Ia manuia le Fonousu a le atunuu.

**FOFOGA FETALAI:** Malo faafetai. O oe na e saunoa mai ia te au, e le lelei le fana a le toaina, a o lea foi ua e nofo. Ia, malo faafetai, malo saunoa. Ia tulai mai lau Afioga i le Sui Fofoga Fetalai. Malie le sui usufono mo Faasaleleaga Nu.1 Sisifo se i tuu atu muamua le avanoa i le Sui Fofoga Fetalai, e i ai foi ona tiute faale galuega, e manatu ai e tuu atu le faamuamua i le saunoaga a le Afioga i le Sui Fofoga Fetalai.

**Tofa NAFOITOA TALAIMANU KETI (Sui Fofoga Fetalai, Gagaemauga Nu.3):** Faafetai. Lau Afioga i le Fofoga Fetalai, faafetai ua maua se avanoa o lenei itumalo, lea ua suia lona igoa, o Gagaemauga Nu.3, ua taua nei o le Gagaemauga Nu.2. O le paia lava aua le afio o le Aiga Sa Peseta ma lo latou Maopu, le nofo a Usoalii i le Faleiva ma le mamalu ia Matautu, tainane foi lau fetalaiga i le Aitu Tagata ma Satoalepai, le fale Fagamalo e faapea foi le faamaluga o Malo.

O lenei taeao ou te manatu o lea ua logologo pualilo nai olo, ua maea foi ona e foa le papa nai le pululauie e pei o le fetalaiga i le Alataua, ua e fai foi ma sui o Arona aua le viiga o le Atua Tolu Tasi Paia, e afua, e tataua ona vivii le mea na fai i Le na ia faia ia. Ona i ai lea o le manatu, nona laia, aua ua logo le lagi ae tau o se pa e togi tau i le ave, i Lana faafofoga e tusa o moomooga o lenei taeao, ina ia sologa manuia ma see malu le faiva o le Fonousu a Samoa. Ou te talitonu foi ou te fia laei i lenei taeao i titi o manaia, ma ou seisei i manogi o le laumosooi se i oo lona sasala i taelega o tausala, ae paga lea, ua toia au i le titi o pagamalie. O lea e afua ai ona ou ta le liu ma ou faatulou i le paia maualuga o le Maota i lenei taeao, ee ia lau Afioga i le Nofoa lau Afioga i le Fofoga Fetalai, malo le soifua, malo le tauatai. Ou te faatalofa foi i le afio mai o lau Afioga i le Taitai o le Maota lau Afioga i le Palemia, le paia o le Aiga Kapeneta, Aiga Minisita, e faapea foi Minisita Lagolago. Malo le faatoa, malo le papale, malo le onosai. Ou te ofo alofa ma faatalofa foi i a outou Afioga i Taitaifono o Komiti Faapalemene, e faapea foi

le mamalu maualuga o sui usufono mamalu uma o le Maota i lenei taeao. Malo onosai malo le tofa. E le mafai foi ona alu loa sa matou faamatalaga e ao ona afe aua ua maualuga lena itu o le Maota. A lafalafa a Tuna ma Fata, o outou o tupu o le atunuu. O lea e le alu loa ai se faamatalaga a Matautu. Malo galulue. O le tele o taimi e tuuaina ai outou a o outou o lima ma vae o le Malo. Malo le onosai. Matou te faatalofa atu, o outou mama na.

E faatalofa foi i le Failautusi o le Fono, ma le maualuga o le Ofisa o le Fono Aoao Faitulafono aua le tautuaina o le Maota i ana galuega fai. Malo le galulue, faamalo le onosai.

Se i taumafai se lagona o lenei itumalo, ae a le Tala o le Tupe e pei ona tauaaoina i lenei taeao e afua mai i le aso ananafi. E i ai le manatu o lou sui a usufono pe a vaavaai i Tala o le Tupe, ua manino auofala, ua leai se mea o toe faanefu i la matou vaai. E mafua i se a? Lea e afua ai ona aoga a tatou semina sa faatino i na vaiaso ua tea atu, lea sa saunoa manino ai le Ofisa Sili o Pulega o Tupe sa faatino i le Tusitala. O lau vaai la i le Tala o le Tupe i lenei taeao mai lava i le aso ananafi, le Tala Faatatau Autu o Tupe Maua ma Tupe Totogi a le Malo, ae faapea foi le Tala Faatatau Faaopoopo Lona Lua 2018/2019 ua matua manino ma taoto aulape o mea uma, le faasoia ma le lufilufi lima lelei lau Afioga i le Minisita. Ua faamalo fai o le faiva.

A vaavaai lenei itumalo i le tulaga o le faasoaina o seleni maua a le atunuu atoa ma ana atinae, faafetai. E le faigofie, aua o le atunuu e le uma le manao, e pei lava ona faafofoga i ai le Maota i le aso ananafi seia oo mai i lenei taeao, o lea lava e tagi itumalo. Aisea? E fia faalelei ia nofo filemu ma nofo fiafia tagata o le atunuu. A o lea ua ou tulai e fia momoli atu le faamalo. Na manino lava le saunoaga a le Ofisa Sili ma faamaioio maea uma, e tele foi fesili na tuuina i ai, ae na matua matagofie lona faamatalaina. O le ala lea o le faigofie o le Tala o le Tupe i lenei itumalo ma le vaavaai i ai. O le matou tulai, tau lava ina faitau ane ai le itumalo i se matou faamalo ma le faafetai i lau Afioga i le Minisita o Tupe le o lo o tu i matagiolo taulamua i le faatinoina o le faamoemoe lenei. O le mea lea, e matua lagolagoina i ona itu uma. O le Tala Faatatau Faaopoopo o le Tupe lona lua 2018/2019, e faapea foi la le tulaga o lo o taoto ai le Tala Faatatau Autu o Tupe Maua ma Tupe Totogi 2019/2020. E le toe tele i ai se matou faamatalaga, na o le momoli o le faamalo. Ua i ai le manatu o lenei itumalo, ua tatau foi ona vave ona pasia le tatou Tala o le Tupe ae se i faagaioi galuega a le Malo o lo o faatalitali mai. O le ala lea o le faafaigofie o so matou manatu ina ia vave ona faagaioi ma faatino manaoga o itumalo e pei ona fofogaina e sui usufono mamalu.

Ona ou oo mai lea i nai motugaafa ma le vaavaai i le tulaga lautele ma le tulaga e tatau ona avatu ai a matou fautuaga faa-sui usufono, lau Afioga i le Minisita o Faiga Palota, e le toe oo se matou faamatalaga i le tulaga o Tulafono, ua taoto e leai se mea e toe suia, ae na pau lava o lea, o lona faatinoga. I le faiga palota na se i mavae nei le by-election a Faasaleleaga Nu.2, lea sa i ai le lipoti o le taunuuga o le faamoemoe sa faatino. O le ala lea ua matou avatu ai se fautuaga, se i silasila ane i ai lau Afioga, aemaise lava i matou mai Salafai, matou mai Savaii. O lea ua atagia i le faiga palota faatoa maea atu nei le tulaga o le faigata aemaise ua utiuti vaa. O lea e taua ina ua fesiligia, o le tulaga foi lea ua oo i le taimi ua lalata le taimi e tapuni ai fale palota a o lea lava e tumutumu, o lea e fia maua se avanoa e o ai i Savaii e faatino le faamoemoe e pei ona i ai le tofa a le tatou atunuu.

O le mea lea e tuutuu atu i ou tafatafa, se i silasila mamao, ou te talitonu o le Fonotaga lenei e tatau ona avatu ai fautuaga, aua a avatu i le tausaga o lumanai i le fonotaga o lumanai, ua tuai. Ae silasila mamao i ai i se tulaga e cater i ai mea uma lava ia, o le taumafai e ave tagata o lo o fia palota i Salafai. Ou te talitonu foi e aoga le fautuaga e faatalanoa ai e lau Afioga ma le Minisita o Felauaiga i luga o le sami. E talosagaina e lenei sui usufono ma lenei itumalo, se i toe silasila ane i se faiga e tatau ai ona ta ifo le 2 ua oo uma tagata i Savaii aua o le 3 i le 4 lena e tapuni ai fale palota. Na pau lava lea o si vala lea fia fesoasoani ai, aua afai o le lipoti e afe tagata e le i palota sa fia o, e le i palota i le faiga palota lea sa fai, o le silasila mamao a lenei itumalo. A faapefea la pe afai e 20 itumalo i Salafai atoa, e fia se numera o le a le palota? Ona tulai mai lea o se faaaitaui ma le justify ai le autu ma le aua o le faamoemoe ia palota tagata uma. O le agaga lea o lea e tau avatu ai se fautuaga.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi:** Lau Afioga i le Fofoga Fetalai, o le a se finagalo o le sui usufono aua o lea e i ai le tatou aso malolo e mafai ona malaga ai ae le i faia, po ua lava le tasi o le aso malolo pe malolo i le vaiaso atoa ina ia faasolosolo ai i Savaii i latou e o o le a ta le logo?

**FOFOGA FETALAI:** Faafetai i lau Afioga i le Palemia.

**Tofa NAFOITOA TALAIMANU KETI:** Faafetai i lau Afioga i le Palemia. Manaia foi le saunoaga a lau Afioga e faatupu manatu pea. Ae i ai lava le lagona foi lele i le upu a le atunuu, e le ogatasi a foi i isi taimi le futia ma le umele. E ese foi le naunau atu i le tulaga o lo o taumafai ai le faamoemoe. E le o le talosaga ia tele aso malolo, o lena e i ina le tofa. A o le aua o le faamoemoe, o le a se faiga e silasila i ai lau Afioga i le Minisita ina ia mafai ona faatino le faamoemoe. O le aua, a faafofoga lau Afioga, o le aua ia palota tagata uma. O le faamoemoe maualuga lena o faiga filifiliga, ae o le agaga e tuu atu i tafatafa, afai la o le lipoti i le by-election e afe ma ona tupu tagata e le i palota, aua o tala ia, ua matou o atu ua taofia matou i le vaa. A o le faamoemoe e fia tuli pea, aua e i ai foi faalavelave i lea aso ma lea aso. E faapena lava le faamoemoe lea e i ai. A o lau talosaga, tuutuu atu i ou tafatafa o lea e tele le taimi aua na pau lava faipule e alu i ai mafaufau i le faamoemoe lea, o matou nei mai Salafai. O le ala lea o le talanoa atu i lau Afioga a o lea e tele e fua i ai le tofa ma le faautautaga i le tulaga lea ina ia lava tapena i ai ia mafai ona... aua sa ave foi lau fautuaga, a o lona uiga, e le o tagata lea o le a tuu i ai le faaletonu, o tatou i le faatinoga o le o tagata i Savaii e cast a latou palota. Ua le mafai ona o, o lea la e i ai le instant fine lea po o le faasalaga lea, lea la o le a tuu i ai. Ia tailo, o le agaga lena. O lou a lagona e le tetee i le faamoemoe o Tulafono ua uma ona pasia i le Maota lenei, a o le agaga e faatino ai, se i toe silasila i ai i se tulaga foi lenei ina ia aua ne i afaina foi tagata, aua o lea e i ai le faasalaga e \$100 ma tulaga faapena. Na ona tuu atu i ou tafatafa a o lena e i ina le tofa i lau Afioga i le Minisita, o lena e i ina. E le maualalo foi i le vaai i ai a lenei itumalo, a o ou mama na. O le palota i le 2021, e moomia le

achieve o le goal sa i ai le faamoemoe o le pasiga o le Tulafono, ia palota tagata uma. Ia o le agaga lena o lenei itumalo.

Ou oo mai i le Minisita mo le Soifua Maloloina, faafetai malo galue, e ui lava e le i leva, ia ae i ai le talitonuga ua loa lau tautua i le Malo, ua e silafia mea uma. Ua matou maua i le matou itumalo, ua maea le asiasiga i le matou falemai i uta i Vaipouli, ua tafafao foi taliga o tufuga uli ma ua i ai sina faamatalaga ua i ai se fuafuaga e faatino ina ia faapena ona tapunia. O lau tatalo ma le faaaloalo ma le agaga maualalo, faamolemole lau Afioga ma le Komiti Faufautua, pe mafai ona faatuatuai lo outou faamoemoe se i fonoa fale Fagamalo ma Vaituutuu se i talanoaina ai ona momoli aloaia mai lea o se matou fautuaga. E taua tulaga e pei ona maua i sa matou faalogo i le faamoemoe ua taoto, e ui lava ina le i pasia ma tulaga faapena, a o le matou tatalo, faamolemole, faatuatuai sa outou fuafuaga. E ioe lo matou talitonuga i o matou tagata, ua fai foi si faigata ona agai i uta, e le o i ai ni gasegase o taofia ai toe leai se fomai. Ia ona o le tofa na ae i le matou sui usufono i le taimi ua sola, e le toe oo i ai sau tala. A o le faamatalaga i lenei taeao, faamolemole lau Afioga se i faatuatuai ane la outou fuafuaga, e matou te moomia le falemai, matou te moomia. Afai o se tulaga o fia ave i tai, ua talafeagai lea, ae se i fonoa fale Fagamalo ma Vaituutuu ona oo mai lea o sa matou fautuaga. Ia ae malo galulue, e afua suiga, matou te talitonu e afua ona silasila mamao i le tulaga o le faafaigofie i tagata. E taua, ae na ona matou tautaualemau i lau Afioga, toe lava o se taimi ona fai foi lea o sa matou feiloaiga ma lou itumalo ona maua ai lea o se fautuaga lau Afioga.

Ona ou oo mai lea i le Minisita mo Aoga, Taaloga ma Aganuu. Se faafetai tele. E fia faaleo i lenei avanoa ua maua ua maea le faamoemoe sa talosagaina. O le mea lea o la e faafofoga mai lou itumalo, o le tala a toeaia e momoli i ai le faamalo e afua ai ona lagona le leo i lenei taeao. Faafetai. O lea e talitonu le matou nuu ma lo matou itumalo, e tele le faasoa aua aoga a le atunuu, ae faafetai o lea lava sa faatino le faamoemoe i le taimi sa matou moomia ai. O lau pule lea, ia alofagia e le Atua lou tulai mai, maua lau tofa aua le faasoaina e le faigofie le tiute faa-Minisita o Aoga, aua o Aoga ma le Falemai, o lea e ave i ai le faamuamua a le Faigamalo lenei. O lona uiga e tele se avega o lena e feagai ma oe, mataitu ai tulaga uma. O ou mama na faamanuia le Atua, tulaga o le aga atu i taaloga, matou vaaia ma le loto fiafia. O lea na saunoa se tasi o sui usufono, e oo lava i Savaii e teu uma faleaoga, tupe e alu. A o le agaga o le lagolago ma le faamoemoe o le Malo, o la e atagia i Savaii. Faafofoga la lau Afioga i le Minisita, pe le maua ni tagata e malaga atu i Savaii mai taaloga ia, a o la e atagia ai o matou loto. Pe matou te nonofo mai i Savaii, o outou mama na, aua taaloga o lea o le a alo i ai lo tatou atunuu. E lagolago lenei itumalo, matou vaai i teuga, faatinoga o mea uma, ia o lena.

E pau lava lea o si vaega e fia oo atu i ai, o le tulaga i auala, lau Afioga i le Minisita o Auala tetele. O le auala lea e alu i le Far & Range i Tafaigata. Sa ou i ai i le vaiaso talu ai, sa ou fesili pe fai ni taaloga faapena ona o le auala e le i teua. Na ona tuu atu faapena, afai o lava le taimi, se i toe silasila ifo i ai ne i te i ua galo.

**FOFOGA FETALAI:** Ou te vaelupeina le saunoaga a le Afioga i le Sui Fofoga Fetalai. Masalo e le o toe mamao.....e le o toe tele foi se vaega o totoe. Ona o lea

ua tatou toai taunuu i le tatou malologa masani. O le a faataatiaese galuega a le Fono Aoao mo lana malologa masani.

*Na faataatiaese Taulumaga a le Fono Aoao Faitulafono mo lana malologa masani i le itula e 10:45 i le taeao ma toe amatalia i le itula e 11:36 i le taeao.*

*Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 2) 2018/2019 ma le Tulafono Tau Faaofi o le Faatatauina o Tupe 2019/2020.*

**FOFOGA FETALAI:** Ou te faasilasila atu ua toe amatalia nei Taulumaga ma Galuega a le Fono Aoao Faitulafono. Ua matu i fau le taliga o le sua ma le taumafataga, ae faaopoopo ai ma maua le faasiligamalosia e Taitai o le atunuu, e faaauau ai la tatou galuega.

Ae ou te le i tapa le Sui Fofoga Fetalai, ou te muai tapa lau Afioga i le Palemia mo se lafo, sou finagalo.

#### **LAFO MO LE TOE FETUUNAIGA O ITULA FONO**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga le Fofoga Fetalai faapea foi ma le mamalu o le tatou Maota nei, ou te tulai atu ma le faaaloalo, *Mo le toe fetuunai o Itula Fono a lo tatou Palemene. Muamua, faataatiaese Taulumaga i le itula e 1:00 i le aoauli nei, ona faaauau lea o le tatou Fonotaga i le itula e 7:00 i le afiafi a nanei seia aulia le itula e 11:00 i le po. E pei ona silafia lau Afioga o le avanoa lea e mafai ai foi ona faaauau fonotaga faatulaga a le Kapeneta i le aso lenei. Ae le gata i lea o le avanoa lelei foi lea e mafai ai ona faatino nisi o galuega a le Komiti o le Palemene ae faapea foi Ofisa Sili o Pulega o Matagaluega, o galuega ua le mafai ona faatino ina i le aso ananafi se i tau mai i le aso, ona o le auai i la tatou Fonotaga.*

Lau Afioga i le Fofoga Fetalai o le lafo lena ma le faaaloalo.

**FOFOGA FETALAI:** Ua faatuina mai le lafo e le Afioga i le Palemia, ina ia toe fetuunai taimi o la tatou Fonotaga ona o nisi o galuega le maalofia, e le gata i le Fonotaga a le Kapeneta ia latou foi matafaioi ae faapea foi i Komiti a le Palemene, e tusa ai o latou foi galuega. Aemaise foi o Ofisa Sili o Pulega o Matagaluega ma Faalapotopotoga a le Malo, o lo o faapena ona auai mai e faatasi ia tatou Fonotaga, e amata mai i le aso ananafi, seia paia mai le aso. Ua maua lenei avanoa e faatino ai nisi o feau, tiute ma galuega. Ua faatuina mai le lafo, ina ia tatou tolopo mo le itula e 7:00 i le afiafi e amatalia ai ma faaiuina i le itula e 11:00 i le po nanei.

*Faaluaina e le Minisita mo Aoga, Taaloga ma Aganuu.*

*Na faamaonia le lafo.*

**FOFOGA FETALAI:** O le a mulimulitaia le lafo e pei ona faatuina mai e le Palemia. Ma ou te tapa lau Afioga i le sui Fofoga Fetalai e faaiu mai le saunoaga. E le o toe tele foi sou taimi.

**Tofa NAFOITOA TALAIMANU KETI:** Faafetai i lau Afioga i le Fofoga Fetalai, ou te manatu e faaluaina le saunoaga ma le malelega a lau Afioga i le Fofoga Fetalai. O lea ua matu fau ua sao i alo foi taliga o le sua a le Maota, maua se faasiligamalosia aua le faaauauina o galuega o totoe.

E le toe umi foi ni motugaafa a lenei Itumalo, aua o lea e le i oo sa matou faamatalaga i lau Afioga i le Minisita o Galuega Tetele a le Malo. Malo le galulue i lau Afioga, ua maua e lo matou itumalo ua maea le asiasiga e masani ai. O le tulaga o auala galuega e faapena foi auala i totonu o aai. O lea ua matou molimauina, ua maea ona silasila lau Afioga faapea foi le Komiti, i tulaga o i ai auala o totonu o afioaga o Satoalepai ma Safai. Lau Afioga, i totonu lava o faigamalaga i le vaalele, a silasila i tusi o lo o faailoa ai ia turisi, ma maimoaga i totonu o lea atunuu ma lea atunuu. E uma loa le Tosua sosoo loa ma le Laumei i Satoalepai, swim with the turtles. O lona uiga e atagia ai le maualuga o lea mataaga, e i le tulaga o le faalauiloina o a tatou mataaga aua le afio mai o e maimoa, ma sasaa mai o latou tamaoiga i totonu o le atunuu. O lea ua molimauina, e le afioaga o le ala lea o le matou tuitui atu i tafatafa o lau Afioga i le tulaga lava o le vaai mamao i tulaga lautele, e faapena foi.....ne i manatu nisi ua matou faapito manu ia tasi i lo matou lava itumalo. Ae le faapena sa matou vaai, o le mea lea e talosaga atu ai, o lea ua maua, o lena ua numera tasi, pe a pasia le Tala o le Tupe. O le ala foi lea o le le tele o sa matou talanoa i le Tala o le Tupe, ona e tatau ona vave pasi ae se i faatino manaoga o itumalo ma nuu. O lea la ua saunoa mai lau Afioga, ia matou te faalo atu, faafetai tele. O la e fafofoga mai Satoalepai, le paia aua sa Peseta, alalatai ai le Aitutagata faapea le mamalu ia Satoalepai. E faapena foi le matua ia Suisala i Safai, matua o le aiga sa Peseta, ma le mamalu i le Atifai, o le agaga lena. Ae momoli atu le faafetai tele, o lea ua silasila o matou afioaga ia, o lea ua maea le asiasiga, lau Afioga ma le Komiti o outou faiva na. Matou popo le fala ma feula le mulila, ae alo lau Afioga i le faasoa o le keke, aua le mamalu maualuga o le atunuu ma manaoga o tatou tagata.

Ona ou oo mai lea lau Afioga i le Fofoga Fetalai i le Minisita o Vaalele Sivili. E momoli le faamalo ma le faafetai, e le i leva nei se faalavelave o lo matou aiga, ao tala ave ia. O lea sa mitamita ai lava le lagona ma pei e aumai le faaamuia a o matou aiga malaga mai fafo ia te au. Ou fai atu e leai, o lau Afioga e tatau ona ave i ai. Aisea? O tulaga foi o tatou air purchase, o le mea lea, malo faafetai, malo le silasila mamao. Aemaise lava lau Afioga o lea ua lata nei ona taunuu le faamoemoe aua taligamalo i tatou taaloga o le Pasefika. O le first entry point lea, mo tagata malaga mai aua le fia silasila, ma auai i taaloga o le Pasefika. O le mea lea, faafetai tele, ou te manatu o i o le a maua ai foi ni faamatalaga lelei mo i tatou. Aua le alo atu o lo tatou Malo ia tatou taligamalo i lenei tausaga. Se i silasila ane ai lau Afioga, toe lava o le toe faaulelei o le car paka i le tulaga o lo o

tu ai, aua le faamatagofieina o le tele lava o lea faamoemoe i le malaevaalele. Ao le aotelega lau Afioga, faafetai.

Ona pau lava lea o si mea laititi o totoe o le mea mulimuli foi lea lau Afioga i le Fofoga Fetalai. O tulaga lava e toe lagalaga pea, o le fautua lava aua se matagofie o tatou taaloga, o lea o le a tatou alo atu i ai. I le tulaga o taifau taaloga, e faamanatu atu o la e.....le Matagaluega o Leoleo, se i silasila ane i ai. E tasi lea tulaga e tataua ona ave i ai la outou faamuamua, aemaise o lea o le a alo atu le atunuu, i tulaga ia, aemaise lava i vaega ia i Faleata ma le agai mai i le taulaga. E tatau foi ona toe silasila i ai i vaega uma ia.

Faamuli ai sa matou talanoa ma so matou manatu i lenei itumalo, i se matou faamanuiaga i taaloga, le au taaalo o faafofoga mai, aua e ta'u ai, e o ma le fua a Samoa. Ia o outou mama na. Matou faamanuia atu, matou tapuai mai i Salafai ma moomooga ia manuia lo outou alofaiva, aua le feagai ai i taaloga e tauave le igoa mamalu o le atunuu. Ia alofagia e le Atua ia maua lo outou tomai, maua lo outou malosia aua taaloga o le Pasefika i lenei tausaga.

Ona foi mai lea o sa matou faamatalaga, momoli atu le matou faamalo i lau Afioga i le Fofoga Fetalai, malo faatoa, malo foi mo le taitaina o le tatou Fonotaga i lenei aso ma le aso ananafi. Malo foi papale i lau Afioga i le Fofoga Fetalai, ma le aiga Minisita. Onosai foi i tulaga o Fonotaga e faapea lava uiga o itumalo nei ma sui mamalu. Ao i ina o lena e taoto ai le tofa ma le uta aua le taitaiina o lo tatou Malo. Manuia le Fonousu a Samoa i lenei taeao.

**FOFOGA FETALAI:** Malo faafetai saunoa i lau Afioga i le Sui Fofoga Fetalai. Ma ou te tapa ma le faaaloalo lau Afioga i le sui usufono mo Faasaleleaga Nu 1 i Sisifo.

**Afioga Hon GATOLOAIFAANA AMATAGA ALESANA GIDLOW (Faasaleleaga Nu 1 Sisifo):** Ou te muamua ona ou faafetai i lau Afioga i le Fofoga Fetalai mo o le avanoa o lenei itumalo, e tulai ai e fai sina manatu e tusa ai foi ma le Tala o le Tupe 2019/2020. Ou te lagona ua maea paepaeulufanua lo tatou aso, le sasao ai foi o le paia ma le mamalu o Samoa i totonu o le Maota nei. O le faafogafoga mai foi a lo tatou atunuu. Ua uma foi ona saunoa ma fetalai i ai nisi o sui usufono ua maea atu o latou tootoo. Ma o le a le toe oo tele i ai se faamatalaga, ae pau lava o lea lau Afioga i le Fofoga Fetalai, ou te faatalofa atu. Faatalofa atu foi i le afio i le Afioga i le Palemia po o le Taitai foi o le atunuu, le mamalu o le aiga Kapeneta aiga Minisita tainane Minisita Lagolago, malo lava le soifua ma le lagi e mama. Afifio atu foi Taitai o Komiti taitasi aemaise o toe Ulutaia o le tatou Palemene e pei ona sasao atu ai sui usufono o le Palemene, o lo o mafai ona galulue ma lagolagosua i lo tatou Malo aua foi fuafuaga ua faataatitia i totonu o lo tatou tala o le tupe i lenei tausaga. E faatalofa atu foi i le afifio ai o Ofisa Sili o Pulega o Matagaluega ma Faalapotopotoga a le Malo. Aemaise lava le faafeagai ai o outou ma tiute ma galuega. Malo le tautua malo foi le onosai. Afio lau Afioga i le Failautusi o le Fono Faitulafono. Faafetai i lou tulai mai Tiatia, ua fai oe ma Failautusi o le Maota o le Fono Faitulafono, lagolagosua foi la tatou aufaigaluega. O outou lava o lo o vae ma lima i ai le Palemene, i mea o lo o latou manaomia i lea taimi ma lea taimi.

Lau Afioga i le Fofoga Fetalai, e momoli lou agaga faafetai i le Afioga i le Minisita o Tupe, le Minisita o Tupe Maua, aemaise uma lava Matagaluega ma Faalapotopotoga ua latou tauaofaiina nei tupe, aua le mafai ona tagolima i ai lo tatou Malo, mo galuega e atiae ai, faaleleia ai ia le soifua maua, soifuaga o tagata Samoa. Ia malo lava le tapena, malo le onosai, ua faataatia mai le ata ma le auga ma le faamoemoe o le tatou Tala i le Tupe, ia autasi le vaai taulai, mo se lumanai o Samoa.

Ou te lagona lava o le agaga lena ua tatou faapenei ai i le Maota Fono o Samoa, ona ua aumai le faatuatuaga ma le faamoemoe o le tatou atunuu, ina ia mafai ona tatou faia ia ni tonu ma ni faaiuga lelei ma talafeagai aua le lumanai o le tatou atunuu o lo o faapea ona taputapu mai. Ia e le oo la se tala tele i le Tala o le Tupe ua lagona e lenei itumalo le lagolago ma le faafetai e momoli atu i tulaga uma ua faataatitia. Ma e pei lava o saunoaga ua maea, e le o ni tamai lauia foi ae o lauia tetele na latou faafeagai ma le tapenaina o lenei Tala o le Tupe ma o lea o le faatuatuaga ma le lagolago e tuuina atu i lau Afioga i le Minisita aemaise foi le Faauluuluga o le Matagaluega, ina ia faapea ona mafai ona faatino ia faataatiaga ma faamoemoe pei ona i ai ia le Tala o le Tupe i lenei vaitau.

Ia ae le mafai ai foi ona tuua ia nai tuualalo, e ao ona faaleo pea aua foi nisi o nai mea e toe faamanatu ma toe taumafai atu ai pea, mea e ono faaleleia ai le itumalo, ia mea foi e faaleleia ai lo tatou atunuu lautele.

Lau Afioga i le Fofoga Fetalai e tauala atu i lau Afioga se fautuaga i le Afioga i le Minisita o Tagata Tafafao Maimoa mai Fafu. Faafetai tele mo galuega o lo o vaai pea, ou te lagona o le tasi lea o Matagaluega o lo o tele ia tatou tupe maua mai ai ona o e tafafao mai ma faaalu ia latou seleni i totonu o le tatou atunuu. Ia ma e ao lava foi ona tagatagai i auala e faaleleia ai foi lea vaega o le tatou tamaoiga. Ma e avatu ai se fesili i lau Afioga i le Minisita, aua e pei foi ona saunoa le Afioga i le Palemia le Taitai o le tatou Malo, i aafiaga o le suiga o le tau i lenei vaitau. Ua matua matauina lava le siisii o le tai, o nofoaga e le i afaina i le tai, ua matuai oo oo i ai le tai i le vaitaimi lenei. O fale foi na fauina mo ia foi faamoemoe, ma le leiloa o le a faapea ona afaina ona o suiga lava lea o le tau, ua vaai ma le faanoanoa ua tele ni afaina ma e tele foi ni gaioga e tatau ona toe faia i ai ina ia faatumauina le matagofie o a taou maota ma nofoaga o faaogaina e o tatou tagata mai fafu.

O lea la o le fesili lau Afioga i le Minisita, po o i ai se alagatupe foi lea mai tupe nei mo le suiga o le tau mitigation funds agai i le tatou Matagaluega e mafai ai ona fesoasoani ai i le industry e tapenapena ai ma toe faaleleia ai nofoaga ua afaina, e le ona o so latou faatamala, po o ni a latou gaioga, ia ae o luga lava i le suiga o le tau e pei ona tatou i ai nei i lenei vaitau. O lea la e avatu ai se fesili i lau Afioga e fia malamalama, po o oo oo i ai se tapenapenaga a le tatou Matagaluega, aua o mea uma ia e tatau ona silasila totoa i ai le tatou Matagaluega i na ia lelei, faaleleia ma ia faatumauina le matagofie o Samoa, aua le afifio mai o i latou o lo o tatou faamoemoe foi i ai, e maua ai le seleni mo a tatou galuega atiae.

Ia ona ou...

**Afioga Hon Sala Fata Pinati (Minisita mo Tagata Tafafao Maimoa mai Fafu):** Lau Afioga i le Fofoga Fetalai...



**FOFOGA FETALAI:** Ia se i tulai mai le Afioga i le Minisita o Turisi.

**Afioga Hon Sala Fata Pinati :** Ou te faafetaia le sui usufono e tusa ai ma le saunoaga matagofie i lenei taeao. O tulaga mo mea o le fesuiaiga o le tau, ia ou te masalo o le vaega lea o lo o nafa ma le Marine po o i latou lea i le Siosiomaga.

O suiga o le tau e le o i lalo o se vaega o le Ofisa o Tagata Tafafao Maimoa Mai Fafo. O vaega foi e pei ona taua e aafia ai Faletalimalo ma nuu, ia o le tulaga lea i mea tau seleni. O lo o i ai ia seleni e faapena ona faaagaga mo mea o faletalimalo, ae o le aafiaga tau i matagi ma mea na, ou te manatu o lo o i ai pea i latou o lo o feagai ma ia vaega, ae e le i lalo o se budget a Tagata Tafafao Maimoa mai Fafo. Ae lelei pe ana e afio atu e ta te faal le mataupu lea, atonu o i o le a maua ai se ata lelei mo lau Afioga, ia ma maua ai foi se lumanai manuia o e tafafao mai fafo, i ai latou o lo o faapena ona faia le galuega, ia aua ou te talitonu, e sao lava e pei ona e saunoa i lenei itula o le aso, e tatau lava ona tatou galulue faatasi.

O le a foi se mea e taumafai atu ai i matou nei, ia o mea lava e pau mai ai le mafai. O le tele pe itiiti, ia a ua i ai lava le mea foi lea, o lea ua o tatou galulue aua le lumanai o Samoa. Ma lou faaaloalo lava.<sup>3</sup>

**FOFOGA FETALAI:** Malo tulai mai le sui usufono mo Faasaleleaga.

**Afioga Hon GATOLOAIFAANA AMATAGA ALESANA GIDLOW:** Ia faafetai tele i lau Afioga i le Minisita mo le fesoasoani mai i se lagona o le sui usufono. Ae faamalulu atu nei mea ua sala ese se fesili, ia ae lagona lava o la outou Matagaluega lea e tatau ona taulai i ai mataupu uma lava tau le taliga o malo tafafao mai fafo, e maua mai ai le fesoasoani, maua mai ai le fautua, i mea uma o lo o mafai ona maua mai vaega eseeese o le tatou Malo. Ia ae ua lelei o le a taumafai pea e fesootai, ona e le o se tamai mataupu le mataupu lea ou te talanoa atu ai, tele ni faletalimalo ua afaina i le siisii lea o le tai, ia a o sina fesoasoani mo i latou e toe tau tapena ai ma tau puipuia ai ia latou meatotino foi ua tele seleni ua alu ai, ia ona o aga lava a le tau e leai se tatou mea e mafai ona faia i ai.

Ona ou oo mai lea i lau Afioga i le Minisita mo Aoga, ia e muamua ona avatu le agaga faafetai, ona o tapenapenaga ua tapena i ai le Matagaluega, i le mataupu lava lea e pei ona laga i le tele o taimi, a lelei lava le faavae, ona alu ae lava lea o mea mulimuli ane, ua tapena lelei ma faatulaga lelei. O se lagona lava la na tele na tuualalo i ai le Matagaluega, o le tulaga lea o le faitau tusi, ma le numera a tatou alo ma fanau ina ia matuai tapue lelei, po o fea la e alu i ai le tamaititi, e i ai le faavae lea o lona malamalama e mafai ona faaleleia ai lona soifua aoaoina. Aua o lea e molimauina nei i lenei vaitau, e le o atoatoa le tatou tapenaga lea mai ni tausaga se tele. E le o na o Samoa foi, o se vaivaiga o lo o i ai i totonu o le Pasefika atoa, le alu i lalo o le pasene o le lelei o le Numera ma le faitau tusi ma le tusitusi a alo ma fanau a le Pasefika.

Ae o le mea sili ma le taua, ou te faafetai atu ai i lau Afioga i le Minisita, o lea ua i ai ia polokalame ua faataatia e la tatou Matagaluega ina ia taumafai ina ia foia lea vaivaiga ia ma lea faaletonu. Ma e ou te avatu ai le agaga faafetai tele.

O le isi lava mataupu ou te lagona e fesoasoani tele lea foi ua i ai fuafuaga a le tatou Matagaluega, o le tulaga lea mo faletusi i totonu o aoga taitasi. E le gata la i Aoga Mauualuluga, ia ae faapea foi i lalo i lalo o tatou Aoga Tulagalua, ina ia

mafai ona maua le avanoa e nai alo ma fanau e maua ai se tusi faigofie e amata ai ona faataitai ona faitau tusi, amata ai ona faataitai le fiafia e faitau le tusi, ia ma alualu ai i luma lona malamalama. Ma o le talosaga lau Afioga i le Minisita, lea ou te lagona ua i ai nisi Aoga Tulagalua ua mafai ona maua ni a latou tagata ia librarian, tagata e nonofo i totonu o faletusi.

Ia o le matou nuu o Iva, ua i ai le faletusi ua faapea ona agalelei se tasi o tamalii o le alalafaga ma le afioaga na fausia se faletusi matagofie, ae paga lava lea, e fia manaomia se fesoasoani i se e mafai ona ia faafoeina lea matata o le tatou aoaoga, ina ia tulai mai i se tulaga e aoga le faamoemoe na mafua ai ona faatino lea faamoemoe e sia foi tamalii. Ia o se talosaga lena i lau Afioga i le Minisita mo Aoga.

Ona ou oo mai lea i le Minisita mo le Soifua Maloloina, faafetai i lou tulai mai lau Afioga i le Tamaitai Minisita. Ia e talitonu foi o lo o fou ou tiute ia ae le fou lau tautua e le fou foi lou galue lau Afio ma o le a faapea lava ona talitonu le faamoemoe o le a faaauau galuega e pei ona tulai mai ai foi le sa i ai i le tatou Matagaluega. Ia e avatu ai foi le agaga faafetai i le Afioga i le Minisita sa tulai mai i le taimi ua tuanai, aua i a matou asiasiga foi, e o atu ai i tua i tatou falemai o le tatou atunuu, matagofie le siisiina o tulaga o faafeagai ai ma e o lo o manaomia le fesoasoani i lo tatou atunuu. O le tulaga foi i le o i tua o fomai pe tasi pe lua aso e o ai i tua a ua maua pea le avanoa e nai o tatou tagata o lo o faafaigata ona o mai po o Tuasivi i Savaii po o Motootua nei i Upolu, a o la ua i ai isi fomai i le taimi lea, e mafai ona latou o ae i ai i nisi mai e le o tigaina tele. Ma e avatu ai le agaga faafetai mo ia polokalame faaauau ma polokalame faatino.

Ma e ou te lagona foi o fuafuaga lava ina ia mafai ona i ai se fomai i totonu o tatou falemai faaitumalo ia o lo o i ai nei, o se fuafuaga matuai lagolagoina, o se fuafuaga e tatalo ina ia mafai ona taunuu i se taimi lata mai pe a talafeagai.

Ae o se tuualalo faamolemole i lau Afioga i le Minisita, matauina nisi o falemai, e le o matagofie le teuina, le faalauleleina, le sanitation e tusa ai ma le tulaga o falemai. E tatau ona atoatoa le mama ma le matagofie o lotoa, o i le faataitaiga o le soifua mama ma le soifua lelei. Ae ua matau, o nisi o falemai ua tele ina ave i konekarate foi ia e o atu e faamama le vao, vaeane foi le sasao o le paia o lenei taeao. Ia ae peitai o le molimau a e o lo o faafeagai foi ma le galuega, ia a tele lava ia timuga ua vave foi ona oso i luga le vao. A logo atu konekarate ae fai mai e le i oo i le taimi tou te o atu ai. E le talafeagai lea faamoemoe ma e o sina tuualalo, manaia ia ae toe foi i Komiti ia e faafeagai ma falemai. O e o lo o i totonu o afioaga o lo o i ai le falemai i totonu ina ia mafai ona latou faia ia lea vaega, e le gata o le faamamaina i soo se taimi, ae i ai pea le fesoootaiga lea e malupuipua ai foi ia maota gasegase ia po o le aufaigaluega foi i totonu o afioaga ma alalafaga. Ia o se tuualalo lea lau Afioga i le Minisita, ae faafetai tele mo galuega lelei ua vaaia pea le suiga ua i ai nei.

Ia ona oo mai lea o sau faamatalaga i le Afioga i le Minisita mo Galuega, faafetai tele lava mo le faalogologo atu ia o lo o i ai pea le faamoemoe mo nai talosaga ua uma ona tuuina atu. Tatalo pea ia lava lau faasoia ina ia vave ona oo mai ia se faamanuiaga ia po o se fesoasoani i lenei foi itumalo ma ona auala o lo o taumafai e galulue ai.

O le isi lea itumalo lau Afioga ua matauina lava le tele o e ua agai i uta, e afifio ma papaaao ai, aua lava le taumafai ina ia tali mai i le apoapoaiga ia o i uta, aua la

le mea lea ua tupu mai o le suiga o le tau, ua le toe sefe ia le gataifale. Ia o le mea lea e talosaga atu ai lau Afioga i le Minisita se i toe tagai atu pea i a matou auala, avatu foi le matou tuualalo, ia masalo lava o i inei i Upolu ua masani lava Upolu a o matou nei mai Savaii a matou o atu i nuu ia i tua e matua leiloa lava po o fea o oso agai i ai pe a fia alu i.....po o Lalomanu po o Lotofaga. E tau le masani lelei, ae o le fautuaga, pe mafai na fai ni faailoilo i soo se magaala, ia iloa ai, o fea le mea e te alu agai i Apia fea le mea e te alu agai i Aufaga po o le Lepa.

**Susuga Hon Papaliitele Niko Lee Hang:** Lau Afioga i le Fofoga Fetalai.

**FOFOGA FETALAI:** Se i tulai mai le Minisita o Galuega.

**Susuga Hon Papaliitele Niko Lee Hang:** E le faalavelavea le saunoaga matagofie a le Afioga i le sui mamalu. Ae o lea ua laga le mataupu lea i faailoilo, o lea ua tapena le Matagaluega o le MNRE aemaise foi le Ministry of Works, e tapena uma ia faailoilo i auala, ina ia mautinoa e silafia e le mamalu o le atunuu, aemaise foi i tagata tafafao mai fafo. E lelei lava le i ai o faailoilo ia, e iloa ai e tagata feoai lea auala ma lea auala, ao lea ua tapena le tulaga lea. Faafetai.

**Afioga Hon GATOLOAIFAANA AMATAGA ALESANA GIDLOW:** Faafetai o lea ua malamalama e le toe oo foi se faamatalaga i lea vaega. Ae o lagona lava e le o tele seleni i mea uma ia e talosaga atu ai sui usufono, ae tatalo atu pea. Se i vaai i e ua atoa le lima tausaga po o le sefulu tausaga e leai ni auala fou, ina ia mafai ona oo i ai le faasoa.

**FOFOGA FETALAI:** Malie le sui usufono se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malilegaoui:** Lau Afioga i le Fofoga Fetalai, ao tatou i ai i ae le i see ese le sui usufono tamaitai, e taua tele lona laga o le mataupu lenei i faailoilo. Ua tele naunau lava faailoilo ua faaleaga, e le gata i totonu o nuu ae faapena foi i inei i le taulaga. O le mea la lea, o lo o ee mai le Minisita o lo o gafa ma le Komiti lea o sui o le Malo. O tatou foi e tataua ona tatou fesootai ma tatou sui o le Malo. E le gata i tamaitai ao latou foi o alii, e lagolago ane ia tatou faailo nei, o lo o fai i totonu o nuu. O isi faailoilo e o atu ua tutu mai na o pou ae ua leai ni faailoilo, ao isi faailoilo ua aveese uma lava ma pou. E aafia uma ai lava le atunuu atoa e le faapitoa i se afioaga e tasi. Ae taua tele mo i latou e femalagaai. E le gata o tagata mai fafo ao tatou lava ia. O le toatele lava o i tatou e le iloa tuaoi o nuu, ao faailoilo nei e tutu tonu lava i tuaoi o nuu.

O le ala foi lena ua le iloa po o le a le mea o le a fai. A faaoga laau e sue atu ua pusa ai suavai a isi aiga e nonofo latalata ane i ina sei tulou le Maota nei. Ae a fai foi pou uamea, e o atu ua sasapa mai pou uamea ua pipio, o lona uiga ua alu le po atoa o tau se i atoa i luga. O le mea la lea e faataua tele mea ia, o lea foi e faafofoga mai le Minisita, ae o tatou uma lava. Se faamolemole a e oo atu i lou itumalo pe afai o fai ma e alu i lou itumalo, se i silasila lelei i le tuaoi po o a mea o tutupu ai. Po o tu ai pea faailoilo na sa fai foi e le Faalapotopotoga a sui usufono mo Gagaemauga Nu 1, ua teva ai ma le fia fai faailoilo o Sala. O le taua lena o le

laga o le mataupu lenei, ia ina faafofoga mai foi lo tatou atunuu. E i ai lava le moemoenoa ma le laufaleaina i totonu o tatou nuu, e ono faaletonu ai ia mea e fai. E i ai la isi faailoilo sa i o i le itu atu le la o Savaii, e le i mafua la ona o taulelea ae mafua ona o le SSIG, ua o atu talanoa i isi matai o nuu, e o e toso i lalo mea la. Se i vaai i ai i le le popoi. Lau Afioga i le Fofoga Fetalai, e taua lava le tulaga lea i faailoilo. O isi ituaiga faailoilo e tau mai ai mea lelei ia e i totonu o le itumalo. Ae o atu la tagata e fia vaavaai i mea lelei ia, ae o la e nofonofo mai ai matai o nuu e ao ia tupe. Se se i faamolemole e faatonu matai na, e o e fai ni a latou galuega, ae soia le o ifo i i, faamataga atu lo tatou atunuu i fafo i ituaiga mea ia. O le mea e sili ona mataga o au o le Taitai o le Malo e afe atu i isi afioaga ou te alu ou te vaai i auala, o lea la e faafofoga mai ia sui usufono ia, e logo ane la toeaiina ia, i ou alu atu foi ae taofi mai au, e totogi le tupe lea e fai ai a latou tapaa. E tasi lena mea e le ono faia ai se auala o se itumalo, o le afe atu o au nei ma Minisita ae o la e nofonofo mai ia isi aulaufa e le o e fai ni a latou galuega. Ae o ifo faalavelave i i i le o atu o tagata e sasaa atu le manuia ia i latou, o fai galuega lelei ma atinae lelei mo i latou lava, aemaise o latou fanau o lea e galulue i i.

Lau Afioga i le Fofoga Fetalai, e pei o se lesona lelei lena o lea ua tupu ae i le mafaufau i lenei taeao talu ai le saunoaga matagofie a le sui usufono tamaitai.

**FOFOGA FETALAI:** Se i tulai mai le Minisita o...

**Afioga Hon Tuitama Talalelei Tuitama (Minisita mo Tina ma Tamaitai, Atinae o Nu'u ma Afioga ma Agafesootai):** Ia faasaoina le taimi o le saunoaga a le Afioga i le sui usufono, e tulai atu e toe faamanatu, o le Tulafono lea o lo o i lalo o le vaavaaiga a lenei Matagaluega. E pei ona silafia o Tulafono o Mataupu tau lotoifale, o lo o aiaia ai ia matafaioi a sui o nuu ma sui o le Malo. I lalo la o le Vaega 15 o le Tulafono o Mataupu tau lotoifale, o lo o aiaia ai afioga i sui a nuu ma sui o le Malo. O la latou matafaioi lea o le vaai o mea totino a le Malo i totonu o se afioaga, faatasi ai ma le anoanoai o isi mau tiute, o lo o aumai ai i lalo o le Vaega lava lea o le Tulafono.

O lea foi la, faafetai mo le faamanatu, ma o lea e fai pea Fonotaga e tai masina a sui o nuu ma sui o le Malo. O le a toe faamanatu i ai a latou matafaioi ia, ao le galuega taulogologo lava lea o lo o fai i masina uma, i o tatou sui o nuu. Ina ia tautuana ma i latou, e le gata ai i lea, o le tumama foi o le nuu. O le latou matafaioi la pe a matauina tulaga nei o e o lo o faaleagaina meatotino a le Malo, i totonu o se nuu po o le itumalo. E tatau loa ona logo alii malu o le Malo, ina ia faia se poloaiga pe faatonuina i latou o lo o faia ia amio le taupulea, po o le faia foi i ai o ni tulaga talafeagai, e tusa ma le Tulafono. Ia aua ai nei toe tulai mai tulaga faapea i totonu o afioaga. O le faaopopo atu lea e tusa ai ma le saunoaga a le Palemia, e puipui ai lea vaega.

**FOFOGA FETALAI:** Malo faafetai, e aoga foi mataupu lagalaga a le Afioga i le sui usufono. O lo o faafofoga mai le atunuu, o le tiute lena a pule mamalu a alii ma faipule, e taulamua ai sui a nuu ma sui tamaitai.

Saunoa lau Afioga sui mamalu..

**Afioga Hon GATOLOAIFAANA AMATAGA ALESANA GIDLOW:** Faafetai lau Afioga i le Fofoga Fetalai. E moni lava au, o avanoa le au maua ia, aua e ese foi lava le matou talosaga atu i mea o lo o mananao ai itumalo, ese foi aga ma tu o lo o faia i tua e le talafeagai foi ma le galulue faatasi ma le lagolagosua i faamoemoe o lo tatou Malo. O le mea sili faafetai o lea foi ua aumai se fautuaga, ao lo o faafogafoga mai foi lo tatou atunuu. Ae faaauau atu sau faamatalaga lau Afioga i le Fofoga Fetalai, o i ai lava a matou taligalu ua....ou te lagona e pei o le faatolu ai lenei ona ou lauga ai i si o matou itumalo, po o totoe ni tupe mo taligalu le Afioga i le Minisita o Siosiomaga. A faapea o i ai, ona faaso mai lea, ona o le isi lava lenei itumalo ua afaina lava i le siisii o le tau e pei ona i ai lenei vaitau.

**FOFOGA FETALAI:** Toe lua minute o le sui usufono...

**Afioga Hon GATOLOAIFAANA AMATAGA ALESANA GIDLOW:** Lau Afioga i le Fofoga Fetalai, o le a.....E i ai lava si mataupu lea sa ou nofo lava ma vaavaai foi ma fesootai foi i nisi o tama ma tina matutua o e sa galulue foi, ma tautua i totonu o lo tatou Malo. O le tulaga o lo o i ai nei, e 55 loa tausaga ona litaea lea. Ou te manatu o se mataupu ua uma foi ona faaoo mai i luma o lenei Palemene, po o nisi foi o vaega o lo tatou Malo. Ae ou te fia faaleo pea lau Afioga. Po o le a se finagalo, lau Afioga i le Palemia, ae se i tagai i se auala pe siisii ai i luga le tausaga o le litaea i le 60 po o le 65. E mafua lea faamatalaga ona e tilotilo ma le totoa foi, e tilotilo foi ma le manumanu i le tofa ma le faautaga. Aua e pei foi ona saunoa nisi, e pei lava o le 65 i le 70 o iina e atoatoa ai se tofalaiga i nisi o tama ma tina. E atoatoa ai foi se malamalamaga i galuega sa faafeagai ai. Ao lea ua oo mai loa i le taimi ua i luga le malamalama ma le iloa, e tatau loa ona faasee tuagalu. Ia ae o mai foi nisi o lo o talavou pea lo latou soifua.

**Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malilegaoui:** Lau Afioga i le Fofoga Fetalai, ua ou televave atu e talia le talosaga. O lea ua faafogafoga mai a tatou tusi Tulafono, tusi loa le 65, ae aua ne i toe tuua i tua. Se i vaai i le Minisita o Sala, o lea toeitiiti 90 tausaga ao lea lava e malosi. E sao lelei, pe tuu foi i le 70. Aua o le mea foi lenei na ala ai ona teuteu le Tulafono o le au faamasino. E gata mai le faamasino i le 62, ona tatalo mai foi lea i le Malo ia le au faamasino e tuu atu i le 68. Ae o la ua ou tilotilo atu i le isi faamasino la na litaea atu nei, o la e talavou. Ae po o le a sou finagalo ae tuu atu pea e fesootai ai oulue ma le Minisita o le Soifua Maloloina. A tuu foi i le 80 tuu i le 80. Ae taua e faatupu manatu, i le 65. Ia fai loa.

**FOFOGA FETALAI:** Tulai mai le sui usufono, amuia oe ua tali le Malo.

**Afioga Hon GATOLOAIFAANA AMATAGA ALESANA GIDLOW:** Faafetai tele i lau Afioga i le Palemia. Ou te lagona lava a avatu ni manatu e talafeagai ona faapea lea ona talia gofie, ae faafetai mo lea faamoemoe pe a taunuu.

O lau faamatalaga mulimuli lava faamolemole, o lea ua i ai ni evidence po o ni faailoilo o mea ua tutupu, e pei ona saunoa se tasi o sui usufono mai Savaii, i le tulaga lea o le palota mo tagata Savaii. Lau Afioga sa o matou taumafai atu ae le i pasia le Tulafono. Tuitui atu pea, ao se matou tuualalo, ao se matou talosaga, o le faigata ia o le aupalota i Savaii ona o uma i Savaii. O le mea ua i ai ou te lagona, ua avea le le faamaoni o i latou i le taimi ua fano, ma mea e afaina ai e e i ai lo latou aia tatau e i ai lo latou agaga faamaoni. E fia o atu e palota ae le mafai, po o nisi lava mafuaaga talafeagai ai. O lea la, e na o se tuualalo ma se faaopoopoga, aua o lea ua saunoa le Afioga i le sui Fofoga Fetalai, ua i ai le lipoti, le numera o tagata ua le palota. Maumau e palota a Savaii pe a o le tulaga lea o le a i ai. Ae tuu atu pea i outou tafatafa le Afioga i le Minisita, feliuliuai ai le tofa pe talafeagai pe leai.

Ona faaiu ai lea o sau tala, ou te fia faafetai atu i le Komiti o Tupe, faafetai tele i lau Afioga i le Taitaifono ma le sui Taitaifono ma le mamalu o le Komiti o Tupe, mo le lagolago foi e fesoasoani mai, e aumai se lipoti e mafai ona tilotilo i ai, ma iloa ai le atoatoa o galuega lo o fitaituga ai le Afioga i le Minisita ma le Matagaluega.

Ona faaiu lea o sau faamatalaga lau Afioga i le Fofoga Fetalai, ou te faafetai i lou itumalo o lo o taputapu mai, ia faapea lava ona maua le mafanafana o le sui usufono, ou iloa o lo o i ai ia la outou tapuaiga ia aemaise foi i Susuga i Faafeagaiga, o lo o faafalemalu i totonu o le itumalo aua lava le saogalemu o le itumalo. Ae ou te tatalo lau Afioga i le Fofoga Fetalai, alofa le Atua ia maua lou soifua faafualoa, maua lou soifua ina ia mafai ai pea ona faaauau lau tautua ma ou tiute e le faigofie le tautaiga o Fonotaga a le Palemene.

Lau Afioga i le Palemia, ia amuia lava oe, ua upuia, ua faaleagaina ona o lau tautua mo Samoa. Ia maua pea le toa, maua le toa, maua le faatoatoa, e faia ai lau tautua i lo tatou atunuu. Ia maua foi le tofa ma le faautaga lau Afioga i le Minisita...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Lau Afioga i le Fofoga Fetalai, aua e te popole, ua iloa foi o au e faitau tusi tele i lauga a vaega ia e i ai Viliamu, lea e fai mai ÷ se a lafoai mai mea na, o isi ou ai na e maua i luga i le lagi. Se tele la nai au mea ia e maua, aua e te popole fua e tele nai au mea ia e maua ou te pasese ai i luga pe a oo mai lenei taimi.

**Afioga Hon GATOLOAIFAANA AMATAGA ALESANA GIDLOW:** Ia lau Afioga i le Fofoga Fetalai, ou te le popole leaga o lea ou te iloaina e le popole le Afioga i le Palemia. O lo o faatino lana galuega e tatau ai ae ia maua le tofa ma le faautaga i a outou Afioga i Minisita, lagolagosua i lo tatou Taitai, ae tainane le afifio o Minisita Lagolago, faapea foi le afifio atu o lenei itu, i toe ulutaia o le tatou Maota, ia maua le faatofalaiga mai le Atua, faamanuia i Ofisa Sili o Pulega o Matagaluega ma Faalapotopotoga o lo o tatou auai, aemaise le Failautusi ma le aufaigaluega a le Palemene, faafetai tele mo lo matou avanoa.

**FOFOGA FETALAI:** Faafetai, malo faafetai saunoa i lau Afioga i le sui usufono mamalu, logoitino lava matagi lelei i le saunoaga, sausau fialele foi le

manu nai Utufiu. Ia o le tali a le nofoa i le saunoaga a le sui usufono, ia faatasi le Atua ma oe.

Ia tulai mai le sui usufono mo Anoamaa i Sasae, ia tulai maia le sui usufono mamalu.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU (Anoamaa Sasae):** Maitau i aga o le Fonotaga, ua foliga ua finagalo lau Afioga e tulitamoe le faamoemoe ona ua vave foi le taimi. O le mea foi lea ua uma ona tuualalo le ia a aiga Sasaumani i lenei foi Itu o le Maota, ua tasi ai le latou tofa ua lava ia au e fai mo latou sui, Minisita Lagolago, ioe. Ia o lea o le a ou lauga faatumua e kava uma ai itumalo o i latou nei.

Ia e le toe ta i tua le tili, leaga o lea ua uma ona paepaeulufanua ma paepaelalago e ala i saunoaga ma fetalaiga o paia ma sa ma mamalu o Tiafau. O paia e tumau e le liliu e oo lava i le faavavau. Ia e ao lava ona muamua ona mua le sao ia Manuvao, ma viia le alofa o le Atua, ia ona o lana pule faasoifua. Aua e foe faaee i le tau le faamoemoeaga o le tagata, ia pe ana le o gatusa ma le finagalo alofa o lo tatou Tapaau i le lagi. O lea ua tatou lauluafesilafai ai i lenei taeao manino ma le taeao totoa, aua ua laolao foi Maota, le suigaula nai le vasa. Ua uma foi ona faamanusina le atu o le sela e ala i le taulaga molia i lau susuga i le taeao.

Ia na ona matou fono faapipii le agaga faafetai aua o le Atua le viia e Samoa, lea foi ua faavae i ai lona atunuu, Tama le Alo ma le Agaga Paia. Sa faitau lau Tusi Paia i le taeao, i le tusi lea 1 Samuelu 17, e i ai le upu faapea o le taua o le taua a le Atua. E aumai uma lava e le Atua latou na i lou lima. E faapena se lagona o le tagata e na te iloa le tele o le Atua lea e tatou te auauna i ai. E le tei tei gofie, tatou te le popolevale, o a matagi o a afa e fou mai, leai e tatou te talitonu o lo o soifua lo tatou Atua.

E le na ma le laina lenei vaitau ma taimi ua agai mai faafitauli ma luluta mai ia faitioga, ia ae o le fautuaga i lo tatou Maota, ia toa le tai, ia fai malu faiva, ioe, silasila i le nofo lelei o le tatou atunuu, o le mea sili lea ma taua. Ina ua tetee i tai lo tatou sa i le aso ananafi, faataumuaava i le faatautoga o le sui usufono fou o le tatou nofoaiga, fiafia le agaga, tulai mai le sui usufono o Safotulafai, le tofa i le Pule, Namulauulu, ia faamalo saunoa faataupou, logoitino matagi lelei, foliga o le sui usufono ua leva ona tapena mo taeao ma aso faapenei, faamalo faafetai. Ua saunoa atu nisi ma faamanuia atu nisi ma faaviivii atu foi nisi, ia ae o le upu lava a Iesu, -a talanoa lelei tagata ia te oe, ia e faaeteete, you know, when people speaks well of you, be careful, leaga e i ai le isi tagata la e tu i tua ma le isi mea faalelelei .

Ae pau lava lea o le fautuaga a Lufilufi, leaga o la e i o lava i Mulivai i gatai o Lalogafuafua ia le mea na to i ai tama ia. O le mea la lea, a le faamanuia Lufilufi i le tulai mai o le sui usufono lea, e le manuia. O le mea lea Namulauulu, o ou mama na, sagai ane ai o le tai, faaosofia moealuaga maua lau tofa, o lau tala lava lea na fai i le tuumalo o Pau, pau se toa ae tu se toa. Ia o lea ua tulai mai le uso, ia viia le Alii. Viia le Atua i le faaogaina o tatou, ia o tatou ia ua na o ni auauna e le atoatoa, o a foi ni faaletonu, ia ua tatou mama lava i le faolataga a Keriso. Amen.

Ia o lea foi ua taua e le Palemia ia le tusi a lau faifeau, ia o tusi ia e ola ai le tagata. Aua tou te faitau i nisi tusi leaga o tusi e tusi i mafaufauga o le tagata, ae o le tusi e tusi e le faauuga a le Agaga o le tusi lena e ola ai tatou.

Ou matau i saunoaga a sui usufono, se o au ua lagona lou fefe ma lou matau i saunoaga. Na ou fia tu atu lava i le po o le aso ananafi, ua faatusa Samoa i sefe panikeke, ioe, e lia lota tino i ia ituaiga saunoaga, aisea? Se o Samoa e tiu i le faaaloalo. Tiu i le mamalu.

**Tofa Olo Fiti Afoa Vaai:** Lau Afioga i le Fofoga Fetalai, o se mea e fia faasao.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** E le soona aumaia ia lafoga i totonu o le Maota, e faatusatusa i ai le Malo e i ai le Ao o le Malo ma tulaga tofi i le sefe panikeke. E le taitai ona paleni ia mea.

**Tofa Olo Fiti Afoa Vaai:** Lau Afioga i le Fofoga Fetalai, malie lau Afioga i le Fofoga Fetalai, o se mea e fia faasao

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** O le mea seu le manu ae tagai i le galu.

**Tofa Olo Fiti Afoa Vaai:** Malie lau Afioga i le Fofoga Fetalai se i faasao ia le mea sese lea e aumai e le sui usufono, silasila lau Afioga i le Fofoga Fetalai...

**FOFOGA FETALAI:** Ia, tulai mai le sui usufono mo Salega.

**Tofa Olo Fiti Afoa Vaai:** Sa fesiligia au e le Afioga i le Palemia ou te le malamalama i se faiga o se tamaoaiga ma mea tau tupe e le o sau taleni lena. Ia ou talanoa atu lea i le Afioga i le Palemia, e tutusa lelei lava le tatou running o le Malo lea, ma lota running o lata sefe panikeke e na o le \$1,000 le mea e fai ai. O le saoga lena o lau tala ae ou te le i faatusaina le atunuu, ia o ai au o le a ou faatusa ai le atunuu i se sefe panikeke? Ma le faaaloalo.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** O le Malo o ai? Ni Malo o ni Initia lea e tatou te talanoa i ai? O le Malo o Samoa, se se i alofa ia sui usufono, tausii le mamalu, le mea lava lea e naunau atu ai le taofi, tago i le too tepa i le ati, silasila ina ia nofo lelei le atunuu. Ioe, o au foi, ua faateia au anapo vili mai lo matou itumalo, fai mai, Alaiasa..

**Tofa Olo Fiti Afoa Vaai:** Lau Afioga i le Fofoga Fetalai, se e faamalulu atu lava i le sui usufono mamalu,

**FOFOGA FETALAI:** Se i tulai mai le sui usufono mo Salega Sasae.

**Tofa Olo Fiti Afoa Vaai:** O lea e manino lava ia lau faamatalaga, o la foi e molimau mai le atunuu, ae sili atu na matuia le upu na lafo e le Palemia ma lau upu na lafo. A, o le malepelepe, o le mativa elo, sili mamao lava le mamafa o upu na na i lo o lau tala sa fai, ia ae o la e faafofoga le Atua, faamasino mai le Atua, ia



ae o le mea lea e saunoa ai le sui usufono, fai mai nei o le la tusi ma Viliamu ae se i vaai nei i le tulaga lea e saunoa ai,

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** Lau Afioga i le Fofoga Fetalai e i ai se mea lea e...

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoui:** e leaga o le faauigaina lena faaSamoa, tuusao lava upu o le least developing countries, e le o se faaupuga la a au. O upu na, e tuu uma lava i lalo o le Malo Afaatasi ia atunuu uma lava ia e maualalo ia lo latou tamaoiga. Ae o le faauiga sao lava lena o le upu lea na ou avatua. A tatou teuteu lumafale i upu, ona le manino lea, o le ala lena o lea ou te avatua ai upu tuusao o le faaliliuina o upu ia mai le Gagana Peretania.

E i ai le polokalame na fesiligia ai au i le aso ananafi, i le faauigaina foi o le tatalo a le Alii. O le faalavelave o le mea lena, lea tatou te tilotilo i le faauigaina o le Tatalo a le Alii e toeiina foi lea e nofonofo i lalo o le talie, e le itumalo o le Sui Fofoga Fetalai. Lea na faaliliu ai e nai toeiina i onapo, ae o le faaliliuga o le faaliliuga a isi foi tagata Peretania, ae faaliliu mai i ina, e isi foi tagata mai le gagana ia sa tusia ai le Tusi Paia. O lona uiga e tolu ia ituaiga faaliliu, lea la ua faaliliu mai, e le o le Tatalo la lena a le Alii tuusao mai lana gagana, a o le Tatalo lena a le Alii e pei ona faaupu ai e le afaaliliu upu, ia lea la ua oo mai i inei, i le tatou taimi, lea la e fesiligia ai au.

Ae o au ia mo mea o le ugapepe, ou te le malamalama i ia mea, ia lau Afioga i le Fofoga Fetalai, ae ou te manatu ai i mea nei o faaupuga nei, pau lava lea o le faaupuga matua ou malamalama lelei i ai. Ia o le mativa lea na sasai ai Samoa, ia ma le upu lena o le elo. Leaga o au sa lelei le aoga faapi tautau. O le ala lena e ala ai ona maai au komaliliu, ma au piliota, leaga e lelei tele le faifeau na ou aoga mai ai. Ia lau Afioga i le Fofoga Fetalai ia pei o le mea lena o le a tauau ina misa le aualii ia, i faaupuga, ae o mea ia, o faaupuga sao lava a tuusao mai e faigofie ona piki, piki e le isi. Ia o le mea la lea, onosai pe afai ua faauiga foi e le sui o tumua nei, leaga e oo loa i mea tau tumua, tau upu, tama la ia e tatou faalogologo i ai, o le autumua. Ia ae se i aumaia alii ia le faautautaga.

**FOFOGA FETALAI:** Ia ua saunoa foi le Afioga i le Palemia, e faamalamalama nisi o mea, ia ae ou te fautuaina, aua le faamamafaina ia le tatou Fono ananafi, e le Afioga e le sui usufono o Lufilufi.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Lau Afioga e le faatau matatao, lea foi ua saunoa le Taitai o le Malo, ia o atugaluga ia o le tootoo, ia ma lenei usugafono. Ioe, leaga e pala le maa ae le pala tala, ioe, e le mafai ona aveesea e nisi nei mea o le a faamaumau ai lava e oo i le faavavau.

Ia valaau mai ia le matou itumalo, ua fefefe, Alaiasa e i ai se isi 1.1 piliona lea i loan faapoopo ia o le a i ai, ou fai atu, ua soo faafa lau faitau i le Tala o le Tupe e

leai se mea. Ua tuu le au ae mai aau. E leai ni mea na o mea o lea e fuafua e leai se Tala o le Tupe lea e soalaupule nei, o i ai ni mea aua le faapopoleina outou. Lou itumalo, toa le tai, ioe, e le faaseseea le itumalo lenei i ni saunoaga. O lea ou te taulimaina le pepa lea o le Lipoti lea a le Central Bank, o mea anoa la ia...

**Tofa Olo Fiti Afoa Vaai:** Lau Afioga i le Fofoga Fetalai o se mea e fia faasao...

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** O lea o le a faa-Samoa e ave i tua i toeiina la e faatali mai se i faailoa ai le sao o le tamaoaiga lea e i ai.

**FOFOGA FETALAI:** Malie le sui usufono se i tulai mai le faauilavea.

**Tofa Olo Fiti Afoa Vaai:** Lau Afioga i le Fofoga fetalai, o au na taua le mea lea. O le Afioga foi i le Minisita Lagolago, o le Accountant numer 1. A silasila nei i totonu o faamaumauga, 53% o le 2017/2018 o le debt to GDP lena. O le mea lea na ma talatalanoa ai ananafi i le GDP, e 2.2. A tago la le Sui Minisita e fai le calculation o le aitalafu, 1.113. E maua lelei lava. Leaga o au ia na o le fai maumaga a o lea ou te iloa fai le mea lea. O faamaumauga lea e aumai e le Minisita o Tupe. Afai la e sese i le Sui Minisita lau tala, o lona uiga e pepelo faamaumauga ia aumai totonu, leaga o le tusi lea na aumai i le lua vaiaso tatou te matamata ai. Ma le agaga faaaloalo.

**FOFOGA FETALAI:** Malo faafetai. Ae a pe a see atu ia lo oulua vaa i se isi mataupu?

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Lau Afioga, o lea ou te talanoa atu i le pepa lea sa saunoa i ai le Minisita o Tupe a o fai le saunoaga a le sui usufono e faamalamalamaga. E 1.06, lea e sau ai i i fuainumera fou a ia. O le ala la lea o lou fai atu leaga o lea e faa-Peretania, o lea o le a ou faa-Samoaina le pepa lea e tufa i lou itumalo ia malamalama ai, e leai se mea e atugalua ai i tulaga ia, o lea e lelei le tamaoaiga, o lea e manuia fuafuaga a le Malo aua Samoa. A le o lena foi, o le a ave faapapalagi leaga e lelei lava fenanui a toeiina i tua. Ua leva ona aoga ma lelei simili a toeiina.

Ia o faiga a ia o le soifuaga, a poia i afa se folauga, e atugalua a i afa le faiva o le tautai, fememeai le tautai, aisea? Pei lava ona ou fai atu o Samoa e tiu i paia ae mapo i mamalu, seu le manu ae tagai i le galu. E mau a e faalele mau e matau. Ona faapena lea o so matou faamoemoe, ia e tusa ai ma lenei Tala o le Tupe ua tuuina mai. O lea ua folasia manaoga o isi itumalo.

Na pau lava lau tatalo, o lea foi na taumafai mai le isi Matagaluega e fai taiala o le faiga o atinae, ae o le taiala atoa o so o se itumalo, o la e sau ma le sui usufono, aua o mea ia na folafola e le sui usufono, a ou tulai mai i le tofi, o mea ia ou te faia, ia omai loa tagata lagolago le sui usufono. A uma la le nofoaiga a le sui usufono ae leai se mea, ia ua iloa foi le mea e oo i ai le sui usufono o tai i le tuaau se i tulou lava le gagana. A o le a tau fai foi nei taiala ma nei mea pei a standardize faasoloatoa leaga e eseese manaoga. O le mea lea, na ona matou

faapena atu, nai atinae o le itumalo. Faafetai i le Afioga i le Minisita, faafetai tele lava i nisi o mea ua faataunuina, ae tautuana, le Anoamaa Sasae i Lufilufi ma Falefa, ua leva ua 50 tausaga o le Malo ae leai se atinae, ai ona sa o toeaia e lagolago le itu foi lea e tetee ai le Malo, a o lea la ua tulai mai tagata e lagolagoina le Malo, se i tautuana, alofa ifo se i lalaga nai atinae mo si nei itumalo. E i ai le auala o lea ua taua mea nei o ambulance, e i ai le matou falemai i Lufilufi, ua uma foi ona foi mai ai le asiasiga. A alu atu le ambulance e alu i le falemai, toeitiiti lava tele le mai o le mai lea na aumai i le salutulutu o le auala lea e toe foi mai ai i i se i maua le aualatele, faamolemole se i silasila ifo, pe na o se selau mita le mamao o luga o le auala, ua tele la gasegase foi ia e tautau paina toto, e masaasaa uma lava i le leaga o le auala. Faamolemole lau Afioga se i silasila ifo i le tulaga O...

Faafetai mo galuega ua fai, i talivai ma nisi auala, ia faamanuia a le Atua i le Afioga i le Minisita. E le umi se faamatalaga a lenei itumalo, faafetai i le tapuaiga a si ou itumalo. Talu ai nei, ua lua faafeagaiga ua fou atu i totonu sa osi feagaiga ma nuu o le itumalo, o le mea lea, faamalo faafetai. Sa tele a foi i Pesega a o lea ua mapu i falematu le toa o le tai aua le taunuu atu o auauna a le Atua leaga e le atoa se nuu pe a leai ni faifeau. O le nuu lava ia o Samoa, o le pulega a alii ma faipule, faifeau uma loa. A leai la se faifeau ua faasevasevaloaia le soifua o tagata, aua e leai se faaleagaga o i ai. Tulai mai le Susuga ia Tafai Galumalemana i si o matou nuu i Falevaio, selau pasene le tulai mai foi a lea faifeau. Ia faamanuia le Atua i lo oulua tulai mai. O le isi tama i Falefa o Tau Toleafoa, ia faamanuia le Atua. Toaga e tatalo ma toaga e asiasi i le nuu ma totogi lua lafoga, aua e te lua faataitai i isi tama e le totogia lafoga. A totogi a lua lafoga, ia e manuia oulua faiva.

Ia, se e i ai tofiga foi ia e faaea itumalo i tulaga faapea, e pei foi la o faifeau. E i ai si ou uso ua tofia i le mea lea o le turisi lea e fesili soo ai le tatou vaega, o le Susuga i le Faamatuainu o le susuga a Lufilufi. O le mea lea, faamalo faafetai i lou tulai mai ia sagai ane, ia e faaaloalo ma e usitai i le Minisita, ae aua e te lua inu ma le Minisita e vave ai ona e faaletonu, ae pau lava le mea ia e usitai i ai. A ia faamanuia tele le Atua i lou tulai mai, ia maua sou finagalo ia atili ai ona tele teineiti aulelei e omai mai fafo e asiasi mai i le tatou Malo, leaga e talavou le tama, e aulelei foi.

Ia, o au faatoa ou foi mai nei ua ou fealuai nei i auala laupapa foi nei o le tatou malae vaalele, se e ese le manaia. E le tau selu atu, ua siitia le tulaga. O mea ia sa tatou moomoo i ai, a ua a? O lea ua tali mai. A tatou tuu lava i faitioga ma nei mea e aumai, ia e leai ni tatou mea faapea e maua, peitai ane tatou te le silisili i ia tulaga.

**FOFOGA FETALAI: Faafetai.** Malo. Ia ua maea le taimi o le sui usufono.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Ia le paia e o le itumalo, le affio o Aiga Sa Fenunuivao ma le Aiga Sa Alaiasa, ae a le afio o le Aloalii, laua Matua ma Iuli ma Moeonoono ma le tofi faasolo i le aai, o lea lava e malosi le tou sui usufono. Ioe, o lea ua uma ona ou foi mai i Niu Sila i lau siaki, ua pei foi o le iliafi le tata o lou fatu o lea lava e lelei. I le tapuaiga ia Lufilufi, o oe o le Tumua,

le Toaono ma le Saofaiga, Tupai ma Seutatia ma le mamalu ia te oe Lufilufi ma ou fuaiala, le Matua ia Ti ma Tagata, ia Tai ma Fonotia. Faafetai tele i la outou faaaloalo. O lea ou te tauave le tatou... you know o le mea lea o Lufilufi e le faigofie le va feagai ai i totonu o le Maota lenei ma totonu o Samoa. O le a foi se vaivai o le auauna, leai e taumafai lava.

**Tofa Olo Fiti Afoa Vaai:** Lau Afioga i le Fofoga Fetalai, leai na ou fia fesoasoani atu lava i le sui usufono mamalu e tau faamama lana sausau o lea ua ou vaai atu ua amata ona fefe le Minisita e le i taitai se la palota.

**FOFOGA FETALAI:** Ia, e ui lava e le lavea i le Tulafono Tumau se fesoasoani a le isi sui usufono i le isi sui usufono, ae ui i lea , ia taoto atu ia i ina i ou tafatafa Lufilufi.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU:** Leai o le aso ananafi, ua tau saia fua le maaveave le fua i le misa a le aualii ia, tau ai fua ma lou alu i Maa ae ou le alu i o i Salega. O au ou te le toe tepa i tua i ia tulaga. O au foi ou te le alu alu i se mea ou toe sau ou toe taumafai atu, e leai, a ou alu loa i luma, alu i luma, ioe. A ua tasi le itumalo ia te au, ou te alofa i ai. O le mea lea, ia manuia lou tulai mai Olo. Ia agalelei mai le Atua.

O le tulaga o taaloga a le tatou atunuu, o lea ua outou silasila i ai Samoa, e le te i te i tulai mai taaloga ia i le manuia, o lena tou te silafia o le Minisita o le tagata sa logologoa i taaloga, o le mea foi lena e tapena ai le uta ma le tai, o luga ma lalo. So o se ituaiga mea ua tapena e le Minisita e faamatagofie ai le faamoemoe, e ui ina leai se tupe ma utiuti le faaso. Ioe, a o lea lava e tapena faafafine toaga aua ni ai mo lau Afioga i le Fofoga Fetalai aemaise le Afioga i le Palemia ma le Kapeneta.

Ona faapea lea o sa matou faamatalaga, ia e poto lava le tautai ae le atoa ni ia i lona faiva. O le a foi sa outou faafofoga Samoa aemaise o le paia o le Maota, se ua ta fia talanoa umi, ae o le faalavelave, o lea ua e saunoa ua uma lou taimi, o au ou te ava tele i le Nofoa. A o le a se tou faafofoga ua taulaulu se faamatalaga, Lufilufi, ia lafo ia i ava magalo le faamoemoe, vaatele i lo outou finagalo se matou tala. Alofa mai le Atua ia i ai ona manuia i lenei Palemene. Le susuga i le Taitai, Minisita o le Kapeneta, aemaise le Palemene o Samoa. Soifua manuia lau Afioga, ua ou alofa atu lava e fai ma e tau tootoo mai, ae malo faatoatoa, o lou toa lena e le mafai, leaga a ou tala foi le mea lea ona e faapea foi lea ua ou oo i tulaga ia. Ae ia manuia tele le tulai mai o lau Afioga ia maua sou finagalo. Soifua ma ia manuia le tapuaiga a Samoa, ae ola la outou auauna i le alofa o le Atua. Faafetai.

**FOFOGA FETALAI:** Malo. O upu lava a le tamaloa Atua, e sau lava le fuauli e toa le moa. Ia, malo e le tau viivii atu pe tau faafuluina le toga lelei. Ae malo saunoa, faafetai foi malele. Malo saunoa faa-Tumua ma fetalai faa-Tumua. Ia ua ou manatu ua faigofie foi le galuega ma ua vave foi le pitolaau a le Malo, o lea ua uma lea itu o le Maota ona saunoa. E momoli atu ai le faafetai ma le faamalo, o le tatou galuega e tausoa. Masalo e le o toe mamao foi, toe lava o toeiina matutua

ia, ana ua tulai mai Faumuina ma Fonotoe ma le Tuiatua Faanofonofu ua tali loa le Taitaifono a ua uma lena itu o le tatou malu.

O ai le tama lea e tulai mai? Ia se i tuu atu le avanoa i lou uso mai Faleata Sisifo.

**Tofa LEALAILEPULE RIMONI AIAFI (Faleata Sisifo):** Lau Afioga e le o au o sou uso, o au o lou atalii. Sa leai se lagona e le taimi lenei o Faleata, leaga o eleele nei ua mavae Faleata e ave mo Samoa, o le malae o le tagatia a Samoa. O lea la Tuisamau, sa ou le fia faalavelave i lau lauga. Vaimauga, e sa sa ona e toe faia se tala faapea i totonu o le Maota lenei.

Lau Afioga, pei lava ona malie i lau saunoaga, o lea ua lata le vaivaa, e le o toe mamao foi toe lua a tatou lauga faapenei o le Tala o le Tupe, aua o le lumanai, e na o le Atua na te silafia, ae a maua loa lou avanoa na aumai le Atua ma aumai e lou itumalo, faaoga tatau. Aua o upu tatou te tautatala ai iinei vaeane le paia o Samoa ma le Maota, o upu e faamaumau, faamaumau ma fesili ai taeao pe a lo tatou sao i le faatautaiga o Samoa.

O lea ma lou faaaloalo tele ou te solituina ai le paia ole Maota o Samoa i lau Afioga i le Fofoga Fetalai, lau Afioga i le Palemia ma le Kapeneta, sui usufono mamalu uma o le Palemene, faamalo le usufono. Le tapuaiga a Samoa i ona tulaga faalupe, le aufaigaluega tofofi a le Atua, le Susu o Lana Afioga Mamalu O Le Ao o le Malo....

le aufaigaluega tofofi a le Atua, le Susu o Lana Afioga Mamalu O Le Ao o le Malo ma Samoa i ona tulaga faalupe, ou te faatulou ma faatalofa atu i lenei itula. Faafetai le tapuai ma nonomanu a o alo lau Palemene aua Samoa ma a taeao.

E faatalofa ma faamalo atu foi i lau fetalai Namulauulu, faamalo le toa ma le sailimalo, malo saunoa, o lena ua faamanuia atu Lufilufi, ia manuia lou tulai mai maua se ai o le itumalo. O le manaia o le Tala o le Tupe lenei lau Afioga i le Fofoga Fetalai, e uma loa ona sisi le Fua, tatou tauaofia loa le Fono. E te sau la ete usufono, e te sau ma lou loto fiafia, sau ma lou lototele ma lou loto faafetai i le Atua, o Samoa o le atunuu muamua na tutoatasi i le Vasa Pasefika. E te sau ma e fesili ia te oe lava, o le a sou sao a o le a sau mea e fai, pe a tatou tomanatu i le tauasa mai o Samoa i le taumafai mai i le amataga, talofa i o tatou tuua. A o lea ua manuia ua 57 tausaga o tutoatasi le tatou atunuu. Ona ou faapea lava lea o au, ou toe taumafai e tali lau fesili; a, se o lou sao la lea, o lou sao lea, taumafai e faatumau le tutoatasi o Samoa ma faaauau le galuega lelei ma le fita na taumafai mai e o tatou matua, o tatou o tausimea, ia tumau Samoa i lona Faavae, e faavae i le Atua. Aua i lou talitonuga maumaututu ma lenei Palemene, o le Faavae lea e manuia ai Samoa mai e lua ma le agai i le lumanai tatou faavae i le Atua.

Sa fai le tatalaga o se tasi workshop, aoaoga sa fai i se tasi o faletalimalo i le amataga o le tausaga, sa tatala e le faifeau ma le Palemia, na uma loa ma savavali mai ma lau uo Fiti o le tagaeta ua leva ona faigaluega i fafo. Fai mai le tamalii lea, Leala, e fai le tatalaga o le tatou Fono nei ae maligi ou loimata, na ou faapea atu ia te outou, amuia outou, leitioa a manuia Samoa tou te tumau i le tou Faavae ma tatalo i le Atua e faamanuia. O le matou atunuu, ua ese le tulaga lea ua i ai, its no longer a christian state, its a circular state. A e alu e te tatalo, ua tau faasa tatalo i totonu o mafutaga e fai. A fai foi se tatalo ua tusi atu lau tatalo e te tatalo ai ua

faasa ona toe tau le Atua, leaga e tele Atua e tapuai le atunuu. Tele le faaletonu, ae amuia outou Samoa, a outou tumau ai i lena, e le mafai ona faaletonu tatou, outou. O le ala lea lau Afioga, o le a le tele o faigata, puapuaga, o mea o le olaga, e tumau a tatou i le Faavae lea e le mafai ona suia.

Ona ou oo mai lea lau Afioga i le Tala o le Tupe, e sefulu tausaga o ma i o ma Levao, vaeane le fetalaiga ia Olo, sefulu tausaga lea a e tomanatu i tua i taimi na lauga ai Lealailepule, e leai se taimi na ou lauga ai ma ou faapea ou te tetee i se Tala o le Tupe. E le gata e le tetee i le Tala o le Tupe, ou te le tetee foi i ni aitalafu. Aisea? Amuia tatou o lea tatou te omai e faasoasoa tupe ma le tamaoiaiga o Samoa, tausaga uma, tausaga uma. O le a ou oo i ai ise vaega, leaga e tataua a ona ou tautala i ai lau Afioga e fesoasoani i mea nei o aitalafu, o le mea lea o le deficit i lou talitonuga. I lou talitonuga lau Afioga, o lo o faamalieina Samoa atoa ma o tatou manaoga i a tatou tupe maua, mai le amataga ina ua ou taunuu mai le 2006 i le tatou tupe na maua pe a faatusa i le tupe maua i le tausaga lenei, ua matua tele le siitaga. O i ina e atagia ai le suiga o Samoa ua i ai i ana atinae. A uma la ona faamalie o tatou manaoga i aso fai pea, ona tatou mananao lea e atiae Samoa, o le ala lea e ala ai ona tatou nofo aitalafu ma i ai le mea lea e tau o le deficit. Afai la e finagalo le sui usufono e aua le atiae le atunuu ma aua le atiae lona ia lava tagata, e le mafai la ona tatou faatinoina i tupe ia tatou te maua mai. A faapea o le tupe pau po o le deficit lea a Samoa e faatau ai tatou meaai ma tofogi ai tatou, ona ou popole loa lea. Ae afai e ala ona tatou nono ma aumai tupe ona e faatino ai atinae, o le ala lea, aua tatou te popole pe atuatuvaale. O le mea taua lau Afioga, o le tele o tatou lea e i ai nei, ua ova i le 50 tausaga o tatou ola, nonofo ma tutupu ae i Samoa. O le faigofie ia ona faafetuunai lou mafaufau. E a Samoa i le 50 tausaga talu ai faatusa i le taimi lenei? O i ina e te fua i ai. E pei o lea e faamamafa le vaai a tatou ma le Ofisa o Tupe i le mea lea tatou te pisa ai pei o le debt, ratio GDP lea e fai nei, le service ratio lea e i ai nei. Se o mea na is like a theory, e faaoga uma e le tele o atunuu, o mea e appear.

A o le mea, e lua mea, o le mea e tau o le theory ma le mea e tau o le logic, e faaoga tataua o le fuafuaga tataua a tagata. Leaga foi o tatou e tatou te le o nonotupe mai commercial banks, po o ni tupe foi nei financial markets. O tatou lea e faamanuiaina i mea ia o consessionary loans, lea na saunoa i ai le sui atamai lea mai Falealili Sisifo. Mai le luasefulu i le tolusefulu tausaga talu ai, na o nai sene ia e togitogi ai aitalafu, ae moomia mo tatou e faatino ai le agai i luma o le tatou atunuu.

O le mea la lea lau Afioga, sa ou fia oo foi lava i le mea lea sa saunoa i ai si ou uso, vaeane le Afioga i le sui usufono faatoa uma atu nei, i le mea lea o le sefe panikeke ae ou faapea, e leai, e le valea Samoa, e le o ni paluga panikeke mea ia e fai nei. O i lava lea e fai ai le atunuu o Samoa.

**FOFOGA FETALAI:** Malie le sui usufono mo Faleata se i tulai mai le sui usufono mo Anoamaa.

**Afioga Alaiasa Muagututia Moefaauouo Malagaitutogiai Sepulona Moananu:** Lau Afioga i le Fofoga Fetalai, leai o se mea e fia faasao i le sui usufono o lo o saunoa nei, leaga lea e fai mai o lau saunoaga lea e aafia ai le mea lea o le sefe panikeke po o lau lauga. E leai e faamalie atu e le o au e ona le lauga

lea, ae saunoa sao i le tagata e ona le saunoaga, ae aua le faatutu mai ia te au leaga ou te le faatusa faapena Samoa i se sefe panikeke. Ia ma le agaga faaaloalo.

**FOFOGA FETALAI:** Se i onosai....

**Tofa Olo Fiti Afoa Vaai:** Lau Afioga i le Fofoga Fetalai o le mea e fia faasao, e uma atu le isi lauia lea na foi na sese muamua mai, a o lea foi ou te vaai atu e sese foi le isi lauia. O lona uiga, e le o ni lauia mea ia o mea o afi. E ta te fiu e faamalamalama atu le aualii ia e le malamalama i au tala e fai atu. Ia alofa ifo lau Afioga i le Palemia se i tau faamalamalama ifo tama ia e toalua.

**FOFOGA FETALAI:** Ia manatua foi o le afi e mafai lava ona afifi ai le ia lapoa?

**Tofa LEALAILEPULE RIMONI AIAFI:** Ia o le a see ese leaga o Faleata e le ai panikeke vaeane le faafofogaaga a Samoa, ou te ai Mc Donald.

**FOFOGA FETALAI:** Malie le sui usufono mo Faleata o lea e tulai mai le faauilavea a Falealili, ae ua ou manatu, e a pe a se i tatou foi mai faaauau le faauilavea a Falealili, leaga o lea ua tatou oo i le taimi o le tatou malologa, leaga tatou te toe amata nanei i le 7:00 ona faaauau ai lea o le faauilavea a Falealili.

Ou te faasilasila atu o le a faataatiaese Galuega a le Fono Aoaofaitulafono mo le tatou malologa, tatou toe amata i le itula e 7:00 nanei i le afiafi seia paia le itula e 11:00 i le po.

*Na faataatiaese Taulumaga a le Fono Aoaofaitulafono i le itula e 12:59 i le aoauli seia aulia le itula e 7:00 i le po.*